

樊榭山房全集

冊五

PL
2718
.J14
v.5

樊榭山房續集卷第六

詩己

西湖競渡曲四首

熟梅過後水如天，疊鼓初聞破曉烟。三載王郎棚

下夢何如閑上汎湖船。

予年來午日皆客廣陵故用王播事

竹風葵日共鮮新，向午湖亭扇障塵。試爲樓家參

轉語，八分烟水二分人。

二分烟水八分人樓攻魏西湖競渡句也

簾影參差幾舸開，傍湖亦有小樓臺。綠窗翦舌教

鸚鵡，催看龍舟獨後來。

青山四壓碧匳幽，高處風光望裏收。絕似東京舊

圖樣，彩旗橫過寶津樓。

瓶花齋賦盆中小松用少陵四松韻



鶚

太鴻



松於衆木中爲性最堅強託根在盆盎鬱屈固不
長雖無鶴來巢幸免蟻見傷想以醜怪姿正壑難
掩藏移青自遠舸分影臨清防我聞天子都名蹟
游軒黃餐脂斲虎魄服粉祝桃康森然未盈尺來
登君子堂赤日絕天地微蔭寧爲涼兒童遭褻視
豈知閱冰霜今晨暑雨駛彷彿龍鱗張拏雲莫便
去奪迅天渺茫何如供嘯傲坐使永晝忘其下置
拳石古色同蒼蒼

李迪秋原放牧圖爲旭瞻作

角觝觝耳溼溼考牧詩中全物色天蒼蒼野茫茫
敕勒歌裏西風涼西風老樹莽蕭瑟認得三朝畫
師筆平顯題李迪畫詩
歷事三朝老畫師縱橫直是谷量餘躑躑疑
從畦種出暎坡蔽隴下層阿夕陽滿地沙草多一

人韋裳轉首坐天晴堆積笠與蓑從來畜獸圖非
易寧著青紅掃魑魅今觀此卷態逼真令我他年
勞夢寐汪生讀書古人齊兼金購此索我題不如
長五牴留二羝君看富如猗頓貴卜式無過西河
河南兩牧兒

入秋酷暑七月十二日晚風月甚清遂有
涼意

新涼有情助獨吟螢影熠熠照堂陰秋聲滿簾那
可覓明月出樹如相尋今我不樂歲云暮古人已
往誰嗣音扁舟後夜汎湖去驚起老鶴橫西林

中元夜同舒雲亭明府竹田甌亭諸君汎
湖

游雲吹盡一輪孤碧漲光連裏外湖買得迎涼新

舫子來看臥水玉浮圖柳邊夜笛清逾迴山際秋
燈淡欲無共惜前汀好風露坡仙逝矣不堪呼

八月十八日同敬身觀潮

西風吹客出重城乘興聊爲江上行買酒旗亭望
山遠焚香野廟拜潮生喧呼兒女秋誇雪浩蕩龜
魚晚弄晴欲學盧郎無賦筆老夫胸次尙崢嶸

沈侍御椒園於任城南池新建杜少陵祠
徵詩紀事

少陵游處剩空池傑構任城始有祠栗主應從許
簿祀酒樓合配沈光碑繡衣風雅千年續飯顆忠
貞異代師待我重來訪陳迹蒲荒菱熟薦深卮

病中以滿城風雨近重陽爲首句得詩三

首

滿城風雨近重陽病減情懷老減狂足輒杖藜渾
得力耳鳴鞞鐸果何祥僮奴決意辭貧主醫匠收
功試古方我已是非俱不問笑看梧葉墜虛廊
滿城風雨近重陽唧唧陰蟲夜漸長瘦比隱侯猶
較倍愁應平子爲分將青燈難遣詩魔燒丹鼎翻
嫌琴客妨領取秋深閑意味不眠常是望晨光
滿城風雨近重陽及至重陽霽色蒼問疾客來時
一二登高人想不尋常

時朱文鹿田招集吳山登高不克赴

琉璃水

淺盛新月瑪瑙天空映拒霜

梁簡文詩瑪瑙映霜天

誰道秋

容麗如許閉門也有小篇章

次韻答平湖舒明府見寄

藉甚舒明府相逢恨最遲因吟湖寺句不減武功
詩俗重持螯日官閑穫稻時自憐多病客搖蕩覓

前期

寄樊榭徵君

滿洲

舒

瞻

雲亭

衆中一握手翻媿識君遲
夜月重湖棹秋燈古寺詩
官身牽別夢樂事負佳時
九日登高約黃花恐後期

謝甌亭送藥資

叩戶聲何急兼金餉病夫
寧憂宋清券恰稱杜陵
須衰賤君何取殷勤俗
更殊朝來知有喜敲枕聽
風爐

晚秋懷攝山舊游

秋氣澹如此孤雲迴未還
病餘留幻質心遠屬名
山古殿松聲冷中峯月影閑
舊題崑上字應是有苔斑

小雪日偶成

苒苒流年小雪催
翻書過日興悠哉
無兒北宇猶栽竹
有句南簷欲問梅
卷葉風多流水斷
護霜雲薄夕陽開
病餘自喜嘗新穀
鼓腹清時又一回

題吳志行從軍圖

故寫軍裝作遠游
比於客帳夢封侯
書生有分垂青史
烈士何當歎白頭
草檄手閑秋巷冷
淅矛語險暮雲愁
不如共我跼趺坐
千古貂蟬付一漚

雨

經秋成久涸液雨
亦知時稍破萍黏
塊微通葉擁池寒
烟飛不去暮雀宿
難遲竟日支頤坐
何妨類白癡

炭鑿二十二韻

人生百寒暑奉養逐時變勞勞營裘葛佐以爐與

扇扇虛本來風爐必熾炭便高門無嚴辰滿室麒

麟炫銷烱不足惜下里詎能徧厥製惟塹良九九

徵宋諺宋夏至後諺云九九八十一家志屑之復羅

之和泉若溲麪金椎脫其模砥石平塗澱南榮曝

使枯坐待風雪戰一枚寘深灰炊火乃自銜初疑

釜星隕漸比陽烏見駮瘥竟日除溫審終夜戀石

墨儷京華木樨笑僧院命名瓴未燒許氏說非衍

說文塹瓴適也燕髡釋云坯與此同一傳遼僧行

一曰未燒者又聞洪景伯嗜古有餘羨永初作官塹

手鑑云塹字出武陽縣宋洪适得眉州漢武陽故城土炭類

則齊擊土技斯擅烘燎等儲侍取義無可揀禦冬

鄙事耳瑣細安貧賤那愁邾穿墮漫學羊琇醺閑

戶起病餘觸物弄筆硯

杭堇浦招集寄巢戲賦冬閨用魚元機和

光威哀聯句韻

銷寒第一會

深沈子夜深沈院月底飛來青鳥三拂拭紅繡開
曉鏡商量白紵製春衫無題慣入冬郎詠有信偏
宜喜字銜夙習偶呼長命女今生堪伴善思男

維摩

居士男
名善思

斜河欲轉應斜眄小市初迎合小慙釀雪

年光歸緩緩翦燈心緒話喃喃吳潮解送明於練
楚岫相望矗似簪願作羅幃君是覆若爲香辦妾
能含佳期箏柱參差定真誥琴弦子細諳舊姓曾
憐碧玉嫁蕃釐記向綠衣參流連臘耐鉤藏醉取
次花錫竈祀甘何事畏寒多晏起殘陽容易到梅
南

鄭筠谷太史挽詩二首

引疾端歸僅數年頓成一枕小游仙故人共惜風
流盡造物偏慳水石緣新史同修長最擅遺經獨
抱子能傳從今玉樹深埋後應有精靈在簡編
平生笑語樂通懷亦抱迂疎與俗乖自重德輿輕
紱冕竟乘神馬外形骸記尋梅下三衣客辛酉春
偕筠谷
西溪探梅訪太
虛上人于花塢忍過城東十字街十字街見
古樂府酒伴
寂寥吟社冷但餘帶草繞空齋

汪秀峯自松江載書歸招同人小集分韻

銷寒第
二會

雪壓扁舟浪有棱載來書重恐難勝排聯清興惟
同鶴增長多聞似得朋歸洛舊傳東野句孟郊有
喜盧仝
書船歸入杭新並蓼塘稱元上海莊蓼塘
藏書七萬卷銜杯不

獨相忻賞欲賃鄰居翦燭騰

十二月八日敦復招集餅花齋食臘八粥

聯句 銷寒第
三會

歲序何崢嶸

周京穆門

星紀忽已弔八葉抽堯蓂

金志章江

聲

五德重漢臘吟社邀襍聯

樊謝

山館喜簪盍浴佛

東京遺

梁啓心設林

設供西竺法漑釜精作糜

丁龍泓

析

薪燎以蠟果兼檜殼膚

杭世駿

米槩升龠合釋之

復揉之

全祖望謝山

載剝還載摺瀘泉力斧冰

顧之麟

蒸餾氣焚納汨汨醅汎缸

吳城甌亭

濃濃乳傾榼宿辦

勝咄嗟

丁健誠叔

早起占噬嗑坐疑集梅林

江啓淑

圍

如禮花塔不待木魚呼何煩齋鼓鞞素甌滿同

盛

江聲

淨饌齊一呷甘芳滑流匙

樊謝

磊塊利用挾羣

喋訝水鳥

林葢

餘瀝施簷鴿口香聞諸天
龍泓腹果傲

古衲利益瞿曇云

浦董

家風靖師答緬思烹穀初

山謝

軒后澤溥洽玉井象昭垂

時

橐籥紀職納人皆依

食住

亭顯

俗始理生陋貴或糅元黃

叔誠

三品侈和雜

貧或點齋鹽

峯秀

七寶爭嘅嚙或詭名目奇

門穆

料斗

說閭闔或困衆指繁

聲江

鋪歡沸吹欲無傳放翁詩

糝膏載

叔庠

劄寒持濟軍飢

林設

晨炊恤僮乏何如

我輩閑

泓龍

文史共歡狎蜡飲用上寅

浦董

談議資某

甲嶺梅吐萼纔

山謝

山茶破紅恰騁辭筆紛飛

時

搜

祕神有嗒節物鬪朋牋

亭顯

故事徵梵夾流連至纁

黃

叔誠

新月照簾押

峯秀

臨平道中

隄畔人家望轉遙映山臨水竹蕭蕭風回微雪瓜
皮艇雲破平林板凳橋

張龍威招同陸南香紆齋耐士諸君集弄
珠樓

爲選東湖勝相攜上野航層波圍酒地疎樹入漁
鄉舊雨前期在新晴客思忘十三回月子流照一
樓霜

東湖月出回船中流有作寄舒明府

留人月似東湖主也逐船移浦漱開直擬君山吹
笛去渾如神女弄珠來寒驚白鷺一羣起春逼蒼
龍七宿迴尙憶連宵趨府客不同婪尾試深杯

葉東宿招同人集德藏寺僧房以食隨鳴
磬巢鳥下行踏空林落葉聲爲韻分得磬

字

突兀雙塔昏斜陽下荒徑離立僧影收林葉已無

剩茲游值深臘吟伴有高興作禮觀師瘞環洲微
汀瀼殘碑不可讀遺恨入烟磬蜂房自開戶初筵
潔早飮茶聲沸庭陰月色破池暝寺有山池微意宵
莫尋清言往如贈伊余淺學人久習迦葉聽願參
滄浪禪勿作小乘證

梅 葉迎坡陸紆齋鮑咸吉諸君招集南莊探

春到江南早一分林亭窈窕集同羣巡廊共訝溪
痕活坐石偏忻鳥語聞幾粒松風留舊臘數椒梅
意動斜矚故園歸去辛盤近回首離情指暮雲

同作

張雲錦

一棹荒寒路幾經殷勤梅信報園丁人來淺水
綠邊花問夕陽紅處亭昔酒香仍消醪酤春

懷淡欲入空冥試燈節後應全放待折橫枝向
膽瓶

汎舟出東新關至臯亭看梅同周穆門杭
堇浦梁葭林丁龍泓吳甌亭汪秀峯作

以下

卯丁

春山秀北郭悵望情有餘中藏萬樹梅白雲誰所
鋤獨往興易盡高唱孰起予同舟五六人皎若英
瓊琚推篷認芳草把卷沿清渠斜陽纔半嶺薄靄
風四除撫迹已成昔言歡方在初幽姿照水際的
的久離居

晚由金家堰步至崇先寺

一峯抱花迴不知凡幾里遲日落未落散策從此
始石梁跨澗空苔枝皆倒倚入寺罷晚參僧堂寂

如水詰曲取微徑返景照花裏瀾漫徧崑壑春透
無剩蘂乍疑吐佛光白毫映霞紫復訝妙香生秘
醇得禪髓盤桓憩松根結茅擬來此何必問通波
遠尋光福市

宿臯亭山下田家

山中無節物新月在茅檐主人肯留客遂爲信宿
淹夜久春氣和露下衣微霑步步踏梅影畫格參
濃纖悄然諸峯靜不覺更漏添歸尋一枕夢酒家
指青帘

游中塔院遂歷上塔院

橫山分小支塋确勢如窘長林交青蒼老藤結蛇
蚓中塔峙其半新構極峭緊稽首問導師燈傳本
無盡

真歇了禪師
有無盡燈記

輕陰翳屋角欲去且復忍須臾

裂層霄幽禽語相引槃跚到上塔修竹密于鬢懸
崖曠以平古榦壓巖嶙冰花間綠雪微罅見遠畛
相對澹無言笑爲東風輶傳聞塔中仙在世只悲
憫至今山君馱夜護階前筍

上塔歸藏真禪
師有伏虎事

桐塢

桐塢我舊過陰森翳叢篠隔林見梅花謂是山月
曉花深不辨徑地寂唯聞鳥但看香雪繁似覺青
翠少此中饒僧廬粥魚出烟杪後游鬢絲增初春
澗聲杳無事爲佛事益以詩自繞

下塔院

有月明果禪師
塔一名月明菴

臯亭西麓深名僧樂幽阻誰知下塢藏亦復近在
渚

菴前有
大池

門前萬梅龍玉鱗待飛舉或蛸然若盤

或凝然若佇俛或若將攫翹或若將語涵吐逆風

香供養藥上侶當年日中機委蛻捷無拒何處閱
真空晚鐘清一杵

撒沙夫人廟

相傳神爲倪氏女南渡初避寇奔匿蒙犯風雨瘡痍而卒

里人葬之

山中後金人南侵神著靈異撒沙退敵事聞封爲護國夫人建廟祀焉

臺殿高切雲北山山半出下視花海鋪上蔭松障
密薄暮一躋攀迴風送蕭瑟翠帷映金燈香霧蒙
玉質在昔建炎初兵氣纏駐蹕神生正笄年走避
致愁疾守貞隕空山退敵合仙術沙揚灌壇雨氛
蔽東皇日傳乏更生文記無令升筆惟有村女兒
酌醴歲勿失

哭趙谷林四絕句

卅載心交類飲醇道南宅近更情親誰知漸老多
寥落纔入新年哭故人

疎泉移岫不離家扶病猶思踏月華寂寂西池人
定後吟魂應是繞梅花

徵車同上話晨昏往事回思一斷魂可惜空摩烏
集闕而今忍見鴛巢門

短牋猶在淚痕多萬事風花瞥眼過還似修文深

巷裏十年殘夢喚何波

用林艾軒哭
徐刪定詩意

臯亭雨泊同穆門堇浦甌亭

月黑臯亭夜色虛一篷風雨傍閑漁蕭蕭破夢三
更後恰恰欺花二月初小舫得爲聯被宿深村大
好閉門居篋中幸有吳牋在滿幅春愁翦燭書

檣李舟中春寒

風尖篷背雨初乾笑攬茸裘且自寬百里圖經吳
界越三朝天氣暝翻寒周遮鶯語依前澀禁勒桃

花不放殘漫道單棲最惆悵陸家賦後詠尤難

宿張龍威藝舫

移船來柳浦難燭坐書巢隱霧城烏翅垂星屋樹
梢詩從謀野獲人是出門交掃榻能留宿寧辭酌
滿匏

東湖嬉春曲張龍威席上作

深裊鵝黃淺撥醅出城便逐野鷗來東湖小有銷
金處老子嬉春第一回

水檻花廊位置存南莊易主石無言人生何惜尊
前醉幾見平泉到子孫

一片波明與柳連水西亭館矮於船杏花淺破紅

闌笑似喚韋娘向酒邊

明嘉靖中禾妓
杜韋最有名

報答春光有數公弄珠樓外夕陽中留連須盡湖

天景莫待明朝雨又風

葉迎坡信臣陸紆齋耐士招汎東湖分韻

晴波渺渺鴨頭新比日夤緣不厭頻草色居然迷

客子花光也復惱禪人時南屏讓公在坐湖頭舊俗工挑

薺船尾行庖細膾鱗莫道無山供望眼天邊九點

淡螺皴

當湖馮孝子鏡扶櫬歸里圖

萬里雲中櫬扶持淚滿襟山行石齧足江渡浪驚

心歸葬神應助捐生願更深孝家看表里竹帛照

來今南史太原王知元居剡縣丁憂哀毀而卒陳宣帝詔改所居青苦里爲孝家里

曉次臨平風雪大作晡至臯亭始晴三十

里中桃花正盛亦一奇也

歸舟火急趁花期作冷開晴故弄姿粉灑亂紅飛

雪裏金泥碎錦夕陽時雲山烟水如相護酒幔茶
檣任所之萬事豪華付公等天公此段獨吾私

小寒食日同穆門鹿田江聲鸛亭諸君汎
舟湖上用楊鐵崖花游曲韻

滿湖春靄山空濛雨微潑火花從風畫船平底如
屋裏撐入琉璃拍天水藏鴉門外水侵門霏霏吹
溼綠羅裙松鬣券臺延細步紙灰不到逋仙墓諸
公豪氣忽飛來笑看湖小坳堂杯喚起龍吟戛銅
椀墨汁淋漓汚詩版酒邊應記儂家西卻借少陵
翻舊題白頭那作砌臺使楊柳三眠橋第四吟成
何用康成牋年年願續花游篇

城北汎舟看菜花同人分韻

三四吟朋一葉舟踏青過後菜花稠連畦金粉雌

雄蜨十里斜陽子母牛北郭不來游女賞東風都
屬野人收分明佛界周遭外襯出紅橋碧玉流

上巳日同人攜酒酹顧丈月田墓兼修禊
事於湖上仍用楊鐵崖花游曲韻

人春水厄如王濛鬢絲輕颺茶煙風佳辰解禊晴
景裏一桁浮嵐低著水人生安得追羨門人清抗
手接飛帟夙好殷勤迴故步酒香草碧鵲啼墓知
吾曹不詎復來

北魏裴伯茂卒友人常景李渾等
十許人于墓旁設酒置祭哀哭涕

泣一飲一醉

魂而有靈知吾曹也書

傍湖亭館看流杯山茶初

開大於椀柳外歌船催蠟板嬌鶯雛燕度橋西凝
望何人控月題若箇當年花鳥使樓上垂垂簾影
四呼童著意擘吳牋爲君重賦蘭亭篇

吳甌亭招同人集繡谷亭看藤花分韻

空亭老藤一千尺高格出屋枝連簷纔過穀雨好
晴色入門蜂子喧聲添春風披猖花爛漫香氣直
透鄰家簾當年亭中老居士尊甫尺牘先生芳時招客情
所欣昔遊已逐仙夢斷但有遺墨留霜縑郎君愛
此等嘉樹廿年杯酒還重拈話久飛英墜朵朵坐
來弱蔓搖檐檐乍疑天女下雲際華鬢麗鬢垂蜚
緇瓏瓏壓架閒新葉青帝弭節遲朱炎歡場況是
害馬少拇陣更數潛蚪兼席中不飲莫如我看客
傾盡知無嫌更誦淮海藤陰句感舊滿襟清淚霑

送舒雲亭明府還京二首

送春兼送客湖上夕陽船欲折蘋花贈相將別思
牽後期如此水前事只經年不斷吳雲影迢迢直
至燕

知君風雅意爲政及前修夢裏烏仍哺官中犢尚
留郵籤攜盡室津樹引扁舟長物隄麋在何須二
頃謀

明府酷好古墨
購數十笏以歸

同人集汪抱樸復園送春分韻

楊柳池塘十畝寬綠陰陰處有餘寒青梅薦酒情
何限白髮傷春別更難繞徑殘花閑步屨點波細
雨獨凭闌年年迎送常如此翦燭題詩且罄歡

五月十五日客廣陵馬半槎招集小玲瓏

山館爲展重午之會出諸家鍾馗畫索題
予得出獵圖

老馗駿騎風蕭蕭一陰生後爲夏苗嘯梁之類聚
若齒屬目用命無敢囂後勁擊擊各有執繩牀背
負攜罌瓢唐裝挾簿似從事數獲且待盛諸簪前

驅何所見醜怪兼跳跄或對持赤梃肅若官趨朝
或牽黃臂蒼或鳴鉦吹箴或建中軍鼓鼙鼙振雲
霄或樹大將旗獵獵吹招搖元豹或鎖掣豪豬或
叉撩此皆偶中耳老馘沈機密算慘不驕半塗突
出遭跡虎相顧動色馳羣驍蹶張在地弩交發投
石向空距獨超搥喉戈長夾大斧欲除世害祛佞
妖天寶年閒楊李輩翼而冠者如麋貓老馘胡不
殪其黨忍使三郎遠幸萬里橋今來畫裏展重午
徒然策勳酌爾桂與椒

廣陵苦熱賦何處堪消暑四首效香山體
何處堪消暑暑消泉響邊竹中醺白雨澗底瀉青
天淅淅侵肌爽泠泠入耳便韜光石橋畔憶此已
脩然

何處堪消暑暑消幽洞邊佛棲深作屋仙遇別爲
天乳滴絺衣冷泥行竹杖便青林通別竇赤日更
凄然

何處堪消暑暑消深塢邊雲多中有梵篁密上無
天襪襪人誰到拖挲性所便法華西去路山翠正
蒼然

何處堪消暑暑消僧閣邊松風灑翠壁鳥影渡湖
天蔬食安清儉樓輟學靜便南屏讓師在懷我定
殷然

邵文莊公溫硯爲西疇作

溫硯銘暑有發
冰寒有韞火既

濟且和燮理在我彼鼎我硯制殊義同汝
革汝從惟金在銘功成斯文而不自有左

右實諸歲寒良友二泉
邵寶著錫山安國製

梁溪江左勝山水清且幽扶輿磅礴氣多產賢達

儔邵公早解組吾道困幽憂北寺毒朝宁南陔樂
林丘後來高顧輩公先導其流東林事孔棘不及
公優游觀公溫硯制剏物匪凋鏤讀公自造銘寓
意深可求漫學水火爭當效燮理謀彼鼎或時覆
我硯常有收範以金從革湯沐合賜休貯以石虛
中卽墨行封侯功成在構炭文出如蒸餹耐寒此
故交附熱豈足侔安氏邑大姓膠山理菟裘重祠
李忠定公撰迎神謳安國重建膠山李忠定公祠公爲作記侍公超
然堂堂在二泉書院良冶爲公鳩牽連宜得書捧硯榮全
牛方君雅好事什襲比琳球拓詞費氈椎徵詩徧
遐陬當共竹爐卷永永傳千秋惠山有王孟端竹爐詩卷

方君任見示後周西嶽華山碑且索賦詩

天和二年萬紐于瑾撰文
趙文淵字德本奉敕書

方君好古人共知探討金石忘飢疲炎暉堪畏早

過我手示宇文西嶽碑非狐非貉本篡竊明月墜

後魏祚移天和之際主英毅關中形勝邦家基素

祇首重豫州鎮嚴恭祀事無敢嬉文先歸美亦有

體諂晉公護殊可嗤禮樂應自天子出奈何冢宰

侈其詞碑云大冢宰晉國公任履阿衡親惟旦稟弼諧六樂緝熙五禮使非含仁

名殿平內難神器不待楊氏窺題云万紐于瑾撰系

出唐裔賜姓爲當年代族九十九此其一耳居山

陞趙明誠金石錄後周延壽公于實頌碑跋云實謹子也謹後魏于栗碑子洛拔之後余家有洛

拔子烈碑云遠祖在幽州世有部落陰山之北有山號万紐于者公之奕葉居其原址遂以爲姓

典午推寅世遞嬗因生胙土紛難追文淵隸書兼

籀篆奉敕稱字固大癡裴回更憶達奚武請雨華

岳剛同時攀藤直上玉女頂白衣見夢甘霖施於

今江介方苦旱安得長吏虔如斯爲君賦此已夏
杪客窗悵望涼颼吹

題嶰谷所藏郭河陽寒風密雪圖

宋已無李成寒林尺幅徒強名今尙有郭熙官畫
風雪重見之主人云此來京師珍重出自我友貽
不用明窗拂蛛絲滿堂寒色動鬚眉我我羣玉峯
下積陰靄濃皎皎千樹癭上絕窮鳥影但聞虛牝
怒號飛湍哀馬蹏得得翻銀杯擔囊危棧胡爲哉
誰家寬嶂柴門開別有凍粟生樓臺浦漵一色相
縈迴幽人高臥無人猜熙寧天子多清燕詔遣從
容婦東絹是時相公成法變豈悟涼雩將集霰圖
成高張清暑殿不數十年同席卷璽壓明昌眼中
見歌聲又唱青山轉

青山轉金山轉上金時謠也

寶繪流傳仍自汴

零落宣和幾宮扇何如坡谷詩才擅發興春山玉
堂院

秋日嶰谷半槎錢予平山堂分韻

何限憑闌意披襟已颯然天清隋苑樹秋蕩海門
烟旅望無千里留題有卅年離心逐涼葉并墮遠
峯前

八月十七夜吳甌亭招同人集吳山看月
分得風字

今年陰雨秋正中重修翫事開晴空吳剛斫卻桂
花朵清光要與朋儕同伍子山頭試飛步石闌干
外何迷濛萬家樓閣墮烟海但見幾點疎燈紅羽
人把酒勸客醉吹笙更喚雙玉童曲終老眼忽搖
蕩霜輪漸上滄溟東一痕碾缺勢尙滿古時不見

今安窮恍然置我素鸞背乘此浩浩青冥風下視
城郭皆倒影微茫莫辨江山雄平生每笑塵世隘
膠膠擾擾如蟻蠓虛明無礙拓胸次羣仙招手蓬
萊公只愁淪謫任遊戲依舊石畔聞鳴蟲三更露
下且歸去回頭碧樹窺玲瓏

秋日同穆門江聲葢林竹田甌亭汎舟至
湖心寺

小別湖光又共探放船秋色徧西南青山白鳥大
圓鏡折葦枯荷古佛龕人影靜隨雲影倒詩情淡
與道情參涼風最戀蕭條趣漫倚前汀漱晚酣

九日同全謝山吳甌亭諸君遊城東報國
院

寂寥九日也恂恂乘興同過古院中蔬圃蟲鳴秋

境界竹房人語佛家風黃花且止盈樽酒碧水聊
窺兩鬢蓬更有斷腸成昨夢神清無復到城東

符昔

生聖幾嘗同游此
今下世已十年矣

月夜唐樓舟中同謝山作

故人襆被共出城疎林明月唐樓行悠悠徒抱文
字癖落落但話江湖情四十五日夜方永一百八
聲鐘最清朝陽初上睡翻著船頭已見含山迎

溪行

溪行堪竟日枝港雜清渾晴景開帆色微霜落水
痕鈴魚黃葉市誇酒白蘋村物價年來貴飢驅不
復論

與謝山偕往廣陵予至吳門疾作遽歸謝
山有詩惜別次韻

生來僧祐偏多病同往林宗又失期兩點船燈看
漸遠暮江惆悵獨歸時

歸舟力疾游烏戍三寺各得絕句二首

密印寺

梁昭明太子讀書處

青墩烏戍近比連蟹舍菱塘繞一川
病客愛來尋古寺前生或有打包緣

霜葉蕭蕭下古廊人傳帝子讀書堂
蕩舟去後生天早免見青絲發壽陽

普靜寺

沈休文捨宅

梁朝佐命齊家令燈暗伽藍長野蒿
捨宅捨身應一例暮年何止懺分桃

沈約懺悔文云淇水上宮曾無有幾分桃斷袖亦足

多云

冷落僧房樹下開瘦腰想像獨裴回
祇憐一代風

騷手邢邵曾容作賊來

壽聖寺

寺塔俱梁時建宋陳去非居此有芙蓉浦月華池

晴日如春望轉迷興來踏徧幾招提雲光東塔過西塔水勢車溪入爛溪

風鐸交喧寶網新

時寺塔新修

簡齋小住覓遺塵白頭

落托詩名賤空憶芙蓉浦上人

餅花齋百八瓷酒器歌

吳君尺牘故物令嗣敦復乞詩

君不見鄭泉酒人稱大戶化身願作陶家土繡谷

先生歸道山酒器駢羅一一精魄聚何年筮坎六

四爻有酒用缶不用匏弁星值斗斟且酌鏤金刻

木徒相嘲綠瓷賦鄒陽風氣自此開孝威埏叔夜

杯與夫柴家雨過天青好顏色俱隨劫火去不回

瓶花齋中霜葉亂觴客香醪互持玩建甌高捧兔

豪圓定盃低傾紅玉半中受五斗甌製同小則二
升之觚四升觥其數一百八件有如念珠曹麴部
風流舊公案前明供飲瓷最多永厚宣薄羣摩挲
串金番蓮發五彩蓮房桃實交雙柯醺壇茶棧肅
皇造今日坐上驅使卷白波只無穆廟窠僻畫於
焉託彷彿廣川屋壁東昏閣酒德未終色荒作追
思雅意遙哇削法士毋譏腐腸藥長公繼美清且
賢醉鄉之後人爭傳要客更唱飛朋牋衛公故物
胡能然就中我愛小觥船不釂亦復堪流涎鬢絲
禪榻非當年故人久作騎鯨仙

同作

張雲錦

繡谷亭主嗜古兼好奇百有八種傳酒卮瓶花
齋中我曾到張筵惜未一見之紫藤花開復花

謝此幸不與銀杯化或云數應寒山鐘鯨吞彷彿聲春容或云數合牟尼珠戒彼沈湎列座隅以我觀之殊未是觥錄事司卽在此一器祇宜一客專大戶小戶分陶埏惡客僅許鷄背殘放士頻勸花棱船定州之白汝州青兼以越州祕色之鮮妍或淺斟而輒止或急觴而遞傳乃信道不離飲器千鍾百觚有深意負才不遇可奈何徒留手澤今傳視不羨蘇晉曲室五萬枚還勝元載熱物三千事故家篋笥寶金玉爭及佳瓷能不俗式仿考古圖燒從提舉局

留青日札宋南渡有

邵成章提舉號邵局置窑造青器

梭眼蟹爪新製摩瑩粉堆脂

芳氣觸

博物要覽汝窑色卵白汁水瑩厚如堆脂然汁中梭眼隱若蟹爪

前明

窯器列朝分雞缸尤推宣廟獨縱遲名酒瀉餘

杭歷歷籤題看亦足

慰意林悼亡

難問高穹竟渺茫看君憔悴鬢新霜情如微子偏
傷逝

時先有令兄
谷林之痛

才似安仁又悼亡多事雁聲啼

夢破無端魚日照更長春椒將獻高堂壽應減中
宵淚兩行

歲暮連雨初晴竟不成雪

夢破南窗海日烘嚴凝纔罷雨兼風徒傳龍媪祈
冬雪不遣鴉娘呪歲豐李峴幾時令粟賤孟郊底
事坐詩窮一旬尙遲青幡信催取天花落半空

元夕集吳甌亭齋中賦武林踏燈詞四首

以下
戊辰

卽漸冰輪特地圓幾年無此好燈天若教兩夜添

晴色不負錢王買夜錢

鬧蛾叢裏鬪新妝去點吳山十箇香學得吳中低
髻子阿誰百媚在中央

詩人家住薦橋街處處看燈此處佳翻破存齋新
樂府底須碧玉拾遺釵

明瞿長史宗吉居薦橋見歸田詩話有燈詞十五首

甌亭亦居此地

雙柳垂鬟竹馬迎映紗籠燭最輕盈兒童也識
熙朝盛一色春旗寫太平

舟行餘杭道中入西溪同穆門鹿田江聲
葢林龍泓柳漁竹田甌亭作

昔游大滌山蒼蒼在天際扁舟似向之轉鼓溪口
柁春晴多斷流芳信恐成滯尋真遠未就假道紆
有計隱見數峯尖屈曲隨岸勢居人盡田家宿處

問漁弟日落村煙生疎梅耿幽翳今宵話燈下身
事同不繫

西溪山莊曉起看梅

入望林端白幽禽出竹飛地偏春作主花好客忘
歸香氣濛初日橫枝近翠微逃禪工畫本千樹見
應稀

西溪山莊有感

闌壓垣衣戶網塵嫩寒惻惻那禁春一池好染羅
裙水只照梅花不照人

汎舟河渚過曲水秋雪諸菴二首

蘆錐幾頃界爲田一曲溪流一曲煙記取飛塵難
到處矮梅下繫庫篷船

經幢宛在水中央春早渾疑水亦香白髮老僧無

一事齋餘分供與魚王

永興寺觀綠萼梅

西溪風土我所愛衆香國裏紛脩態元章大叫梅
花王永興二株乃前輩竭來日晚佛屋深竹翠嵐
陰交晻曖無多落照上花梢賞會令人增感槩少
年見此全盛時盈畝空園被花礙巡簷斛斛堆綠
珠染袂珊珊潑濃黛一株忽受冰雪折空腹驕然
古根在扶持不得山僧力槎枿仍抽凍蛟背疎花
數點生意回倔强天教閱人代海月多情魂爲返
松風相响寒先退題詩苦憶東澗老祭酒親栽今
豈再梅爲明神廟時馮具區先生手種錢牧齋有
共憐祭酒風流在不惜看花道路賒之句
隔溪橫笛莫輕吹一勺清泉向花酌

自木橋至宋輦道中作

籃輦行穿曲復深春雲淡淡竹陰陰平橋正對青山出古道曾傳翠輦臨燒筍他時成故事探梅此日有同心嗟予會逐風埃去禪板詩瓢約重尋

南屏山房訪讓山上人

經年阻幽踐覓路出高松湖色浮空曲雲陰過別峯禪餘寒尚在話久午初逢自笑瘦居士偏宜筍蕨供

同讓師汎湖看新柳

隄上無窮柳春來那忍攀絲長初蘸水綠淺不遮山煙態思前日風情媿老顏阿師觀物幻相與棹舟還

七寶山三茅觀同人春望

茲辰風日美閑客此閑行竹暗青藏磴江春綠抱

城唐鐘隨火去宋牒與苔平鶴背茅君下應悲世幾更

花朝雨中同人汎湖分韻

六扇青篷載雨低雲行只在衆峯西飛來詩句渾如溼催放花心半未齊罰錢乍呼驚屬玉游驄不到惜鄣泥畫成水墨施家樣剩有袈裟許共攜

時恆

公在坐

薄暮出湖上至恆公方丈同人分韻

好遨今尚有遺風

陳唐卿云杭人好遨自緩緩歸曲始

春月招尋得

數公掠段家橋昏綠外到孤山寺水煙中靈雲舊話桃花在慧遠心期蓮漏同此夕清歡應不寐將船留繫曲廊東

春湖夜汎歌

晴湖不如游雨湖雨湖不如游月湖

二語出明張合宙載乃當

時杭

同時看月兼聽雨二事難得魚熊俱沙外登

舟櫂徐撥天融山暖雲初活水月樓邊水月昏

李

戒菴漫筆云杭湖船精妙者曰水月樓

煙水磯頭煙水闊

葉公祠乃張太宰煙

水磯見錢心卓筆記今曲院風荷亭子皆其地也

尊前綠暗萬垂楊月痕

似酒浮鵝黃一片蛙聲遙鼓吹四圍山影爭低昂

此時坐上各無語流雲走月相吞吐欲潤冥冥隄

上花故灑疎疎蓬背雨合成芳夜銷金鍋繁華千

古隨逝波誰把長橋短橋月譜入吳娘暮雨歌雨

止依然月不見空裏湖光白如霰歸向龍宮枕手

眠粥魚初喚流鶯囀

四照亭曉望

孤嶼亭空斂曉煙袂衣初試鬪輕便諸天宮殿琉

璃上二月湖山錦繡前紅雨欲飛驚宿鳥碧波不
動待游船詩成散入城中去破費家家十樣錢

雨中柳漁招同諸公汎舟北郭看桃花用
少陵江畔獨步尋花韻七首

暎晴預作看花約無奈一宵風雨狂司家橋頭進
船路三尺水滿上魚牀

天桃穠李上河濱霎霎濛濛溼好春雨師若借霜
威避東道應知是主人

村迴港曲見漁家帶雨飄來幾片花盪槳應知有
春色打篷幸不在天涯

半山山半出雲烟無處花多不可憐七娘子廟何

人到折取繁枝供几筵

半山七娘子廟崇善王
妹也見咸淳臨安志

不辨花源西復東年年花事雨兼風鴨頭依舊十

分綠人面可如前度紅

柴門臨水自成蹊吹溼青青酒旆低桑眼含時未
蠶浴花枝重處有鳩啼

莫愁衝雨回船早明朝看卽落紅催老夫一春好
懷抱不向花開何處開

放船自孤山至湖心寺作

山螺翠寫午晴餘艇子沿緣興未疎草比羣腰猶
淺淡水如鏡面更空虛載來雙笛楊公濟坐共孤
禪孫太初前輩風流應不遠倚闌斜日爲躊躇

宿南屏讓公房用東坡病中獨游淨慈韻

笑拖雙屐入空山借榻松風竹靄閒得得來遲如
有約騰騰游好許誰攀禪燈照影詩皆瘦客枕和
雲夢亦閑更愛點茶三昧手火前曉試不知還

燈五

會元洛京福先寺仁儉禪師放曠郊野謂之騰騰
和尚萬水千山得得來貫休句也是日與讓公汎
湖歸
故云

曉發南屏渡湖歸舟中寫望

乍解輕舟曉色交僧房回首小於巢一湖春水窺
山影十里初陽上柳梢爛漫狂名幽鳥識參差老
態野人嘲游蹤未逐香塵動遠聽漁榔隔浦敲

三月三日同穆門設林竹田恆公酌顧丈
月田墓兼修禊湖上分得之字

料峭東風上巳期故人一去更何之經年來
公酒此日空題逸少詩渲碧湖寬春雨後滲金山
好夕陽時回船不盡餘寒意安得英靈共此奇

寒食日同穆門西顥集湖上時西顥自閩

中歸

水蒲風柳綠黏天有客初回嶺外船冷食正宜供
輦腳幾年相見各華顛茶香僧舍催新火花落湖
隄逐暗泉他日幽居如可卜放生社約白鷗邊

晚春初霽大恆讓山二上人招同諸公集
南屏山房看湖上新綠分韻

衆壑斂殘雨高窗萬綠添風光動深樾山翠滴虛
檐密映晴絲卷香分細草兼下方新畫就濃黛染
重窗

樊榭山房續集卷六

樊榭山房續集卷第七

錢唐 厲 鶚 太鴻

詩庚

月夜泊吳江

蒹葭望極淨無烟小泊秋娘渡口船對月心情多
往事阻風滋味又今年江空列宿依人近夏淺餘
寒與水連正是清和好時節潛蚪光動不成眠

游水木明瑟園簡陸茶塢二首

小舫閑停岸輕輿遠繞村言尋甫里宅不減辟疆
園水氣涵虛閣山光隱短垣夏帷紛衆綠暫此息
塵喧

樓指中吳勝如君有幾家亭留高士跡中有介白亭爲吳江

徐高士舊隱

賦並小園誇

朱竹垞先

鹿柴陰連竹魚幢

俯浸霞主人何處去山僕且擎茶

由上沙登靈巖山寺

山迴似馬奔天低但鷗沒籃輿上沙來吳宮問禪
窟酸嘶歷翫喘汗淩坳凸人勞怯衰步徑轉得
清樾君王昔游宴鑿翠構華椀誰知水犀沈永作
金仙謁屨廊既湮蕪琴臺空突兀皓然太湖陳勢
欲吞溟渤東西雙黛浮帆影望超忽鷗夷去不回
古豔久銷骨焚香禮斷塏捫苔讀遺碣擬聽夜泉
聲松閒弔烟月

元僧惟則師子林今爲齊門某氏園泛舟
往訪闍者以閨人居此辭焉悵然有作

名僧遺石在迢遞訪前塵北郭圖難覓

徐効文有
師林十二

景圖東林社未湮不逢澆竹叟偏住散花人悵悵迴

船處溫風蕩綠蘋

召伯埭

開帆廣陵郡似別故鄉時古埭傳遺事垂楊繫遠
思鳴鉦估客舫吹笛女郎祠稍喜湖天闊風蒲舞
鷓鴣

淮城寫望

旅泊孤城外長淮入望勞天形倚蓋遠水勢築垣
高快雨鳴葭屋涼風透苧袍重過枚叔里蕭瑟感
顛毛

午日淮陰城北觀競渡四首

此日家家喚艇行一灣野水是新城無人更說防

淮事烟柳風蒲到處生

淮安新城爲
明福藩時築

驚飛沙鳥兩相呼鏡鼓緣流引客娛不分午風涼

似水爲他兒女颭釵符

誰家林際小園亭過盡豪華物態零幾折虛廊通
淺渚壞橋無柱上浮萍

吟朋應是憶天涯舊曲樽前小字斜

丙寅午日與
馮亭敬身諸

君湖上賦
競渡曲

猶有浴蘭遺俗在晚來閑過賣漿家

晚渡黃河

聞道呂梁險東分此地寬緯蕭詢土俗翦紙祭波
官落日中流赤長風五月寒高堂念游子舟楫報
平安

嶧縣待牘呈沈侍御椒園

京洛十年別相逢鄒魯閒汎舟君有役

時椒園以
催賑至山

東倚楫我多艱官燭南牀話離杯北路顏高情得

津送圓月墮前灣

過微山湖

青山去遲遲風柳吹靡靡湖空生白雲何處弔微子

魚臺道中

爲春秋棠邑魯隱公觀魚處

推篷纔睡起入眼似江湖小鴨隨孤艇連山出短蒲矢魚沙戶慣庠馬水村無且喜緇塵避甯愁好句逋

南池拜杜少陵祠

太息杜陵叟空垂萬古名文章羈旅賤身世腐儒輕勝地跡猶在荒池風自清迎神有新曲讀罷一含情

祠爲椒園所創有碑甚工

避暑河干佛閣時守牕任城六日矣

守牕復守牕一朝還一朝淹遲如此少熱惱豈能

消佛影依高棟天風對麗譙他時思在莒只合樂
顏瓢

嘉祥書所見

落日嘉祥縣人家早閉門如何大陵氣偏照阻飢
村怪鳥兼遙哭殘蠅聚亂墻二東膏澤徧猶有未
招魂

六月六日舟中寄查蓮坡

六月六日寺前牖客子枯坐愁書空岱雲膚寸幾
時合汶水涓流何日通豈有詩篇傳濟北漫將米
價問江東

時聞江浙米價騰貴

美人咫尺勞相望尙隔津門

烟樹中

題查七倫鑷白圖

風流橫漲橋東客河上相逢各行役鬢鬢三十頗

有餘未點吳絲一莖白幾時阿堵爲傳神苦吟幻
出郊島身平明攬照忽自訝春苗那作霜營新如
予衰老藏漁釣偶逐風塵供姍笑刀圭乞取涅槃
緇輸與長楸衆年少看君射策銀案前頷髭早摘
何翩翩從今鏡鑷真堪擲但數持梁蔡澤年

汶漲

五汶一宵發遙從泰岱東灌河聲挾雨入牖勢分
泐舟楫今朝活囊錢兩月空蒼茫雲霧外何處答
神功

月夜謁分水廟作

芒芒禹蹟畫九區千年距野更須與大河南徙伏
流斷惟有轉漕爭川塗我來涼月出深樹清鐘未
絕靈祠趨祠前地勢若覆盎銅丸注坂兩下俱古

汶西行正當面鮫宮貝闕良 巨無辜流彷彿似彭蠡
馳波相背漂以輸南岫北枕競望此箭筈脫手
荷傾珠村氓離立話遺事壅遏詎匪由人乎白老
奇謀戴村築東逝那復滄溟紆太倉紅朽賴一綫
萬斛傳送如輕鳧奈何利害互倚伏頻遭秋潦飢
難蘇衆神部署有主者誅風刑雨功非誣溝渠不
溢百穀遂田家旦暮歌烏烏治粟都尉奉牲醴飫
及介卒兼鱗徒

東平

鄆州東下會通河小艇乘流疾似梭地憶須句風
物古都經劉豫廢興多雨能消暑濛濛至山不知
名淡淡過垂老那禁行旅感每逢佳處一高歌

晚泊張秋鎮

薄暮初收雨，維梢著處家。斷虹遙飲海，返照倒明沙。卒律愁煎餅，奔渾笑煮茶。吳杭炊枕底，一飽任天涯。

東昌阻風

伏日舟中聽曉雞，無端風雨共淒淒。浮雲西去遙連魏，綠樹南來漸入齊。災後名區絲竹少，病餘舊僕語言低。愁城如許攻難下，一矢書成亦枉題。

南皮

南皮城下水灣洄，悵望空尋讌友臺。季重子桓俱已矣，浮瓜沈李亦佳哉。百年勛業翻成恨，萬古胸襟不易開。我欲臨風弔遺跡，片帆正約白雲來。

滄州

蜿蜿高城四面通，遙看飛鳥沒長空。緣隄槐柳清

風外比屋魚鹽落日中漢室望仙徒自苦唐家橫
海爲誰雄閱人只有滄波急倚櫂無言盡向東

七夕查蓮坡招同英司馬夢堂吳東壁陳
對漚集南碕草堂以荷淨納涼時分韻得
荷字

羈懷不可釋憚暑期烟蘿嘉招愜心素南郭尋行
窩修梁百步餘沽水通小波絲楊盡踈地彌望菱
與荷客來冷香中遙吹銷煩痼林蟬無輟響秋思
亦已多坐中半故鄉佳節感蹉跎頽陽飛鳥外新
月層城阿情話尊未竭歸軒指斜河

題蓮坡澹宜書屋種竹圖二首

北方種竹如種玉幽人愛竹一叢足略似黃陵古
廟前月痕照破秋烟綠

我家屋後百簷簷
戛雨吟風半畝強
莫怪披圖動鄉思
來時新筍正過牆

蓮坡以佛手柑見餉賦謝

秋香新載海門船
分得兜羅別樣絲
恰稱客窗清夢後
偏宜書幌晚風前
悠揚突過千花氣
受用惟憑一指禪
我正迷方煩導示
須曼應有舊因緣

酬英夢堂晚過寓齋元韻

海津多沮洳
高館傍古堞
閉門秋草長
無客共日涉
司馬方外流
趣遠神先愜
主人呼燈至
小坐聽風葉
卽此尋元言
相期在白業

晚過古春小築奉訪樊榭

遼海

英

廉

夢堂

游雲不滿空
返景下疏堞
佳人隔深巷
薄暮引

幽涉相違期非遙相見意彌愜微風亂燭影涼
雨鳴蕉葉寂寞共西窗惜此清淨業

題方正學先生雙松圖爲蓮坡作

款云洪武八年

花朝寫祝丹崖老先
生嵩壽後學方孝孺

逐燕高飛兵甲動金川門開浩呼洵侯城先生真
大勇一語文皇魄爲悚騎箕上天不旋踵故友門
生紛總總慘淡金燈孤主擁木末亭邊但遺冢文
字禁嚴衆胥恐雙松若非牛革鞏定是陰崖鬼神
捧流傳何年拂塵墮玉軸綾裝鸞鵲撥一株傾
敲如病瘡作鱗之而疑豢董其旁一株蟻穿孔野
又拗怒兩臂拱偃蓋紛披白雲滃寫祝丹崖唐應
奉肅先生署名端且竦是年嚴君戍倥傯初事潛溪
角猶慙

洪武八年先生父克勤戌
浦江先生初從宋景濂游

偶然墨戲興

涌勁氣貞心天骨重韋偃畢宏翻
翮燁澹宜主人
寶若珙出自千秋讀書種白眼阿師詎
懵懂金幼致
胡廣諸臣生食俸桃李爭春漫矜寵

同作

宛平

查爲仁

蓮坡

凌晨客過展畫又再拜肅瞻文正筆青天忽墮
雙蚪龍謾謾如聞風雨泣我思此圖四百載絹
素雖殘墨精采百靈訶護避劫灰留與侯城集
俱在揮毫公正卯角年英氣早已腕底宣花朝
寫祝丹崖叟應是上書代戍前蒼皮溜雨明青
銅一松盤屈一摩空似公東市就義日慷慨乃
攜哲弟同長陵渡江紛白刃公先諸臣慘相殉
當時榮悴何足憑少師墨竹隨烟燼戴冠濯纓亭集有題

少師
墨竹詩

閨七夕汪西顥自京來津門蓮坡招集水

琴山畫堂分賦

飛絮漂萍少定蹤西沽何意此相逢天邊星漢剛

連閨人世朋尊不厭重萬里征帆勞似鵲西顥自京

往返一宵情話碎於蜚子歸為報湖山侶滿箸蓴

絲待阿儂

題蓮坡雙鳳圖

蓮坡于丙寅春夢雙鳳飛集屋欄各銜金篆字一曰

貞一曰福後納二小姬名適與之同因作此圖

娉婷市裏見雙身好夢分明證宿因瑤水生來千

百媚彩雲飛下一重春蕙蘭元是含貞性風月何

妨號福人

楊廉夫晚號江山風月福人

記取辟寒金上字香奩

詩話最鮮新

蓮坡著

東堂觀劇四首次西顥韻

秋河雨後溼模糊小部徵歌集飲徒此是武宗絃
索調江南倦客得知無

韋氏闌前許和子岐王宅裏李龜年爲君留客殷
勤甚停卻明朝放溜船

閑房新聘紫雲娘絲竹錚鏦置兩牀塊壘年來銷
已盡白頭猶入少年場

吳雲燕月兩怱怱別意方新酒正中一曲當筵如
一世莫辭聽到六么終

原作

汪沅

衣冠優孟醉模糊從古神仙屬酒徒竿木逢場
聊作戲童心還憶昔年無

浣香樂句染香笛不聽清歌近十年今夕東堂
競絲竹爲渠悵悵罷觥船

屏幃記曲有貞娘合製箏牀共笛牀我亦中年
感哀樂何妨陶寫百千場

生憎催別苦恩恩聚散無端一霎中久識人生
同爨演銷魂不待管絃終

蓮坡餞予竹閒樓張燈看月得三絕句

燈映迴廊月上樓交光特爲故人留空庭荇藻浮
沈影襯出紅蓮竹外秋

從來秋月最淒清添得春燈豔更明不是露蟲喧
酒半渾忘身在海津城

今夜燈筵昨夜歌歡悰無奈別愁何明朝回首西
津路明月盈盈秋水多

歸舟行衛河西顥先發一日中塗相遇知
有武昌之行賦此送之

水宿懷前儔荒雞已戒旦乘流各參差近岸屢迴
轉停橈復相逢行計中道變男兒且依劉鄉井何
足戀迤賤予所安才諳子堪羨江夏黃鶴樓青山
漢陽縣

太白句

到及葉飛初高吟獨不見

獨流口

周世宗北征下三關由此泝流而西事見通鑑

軍容無復汎龍舟古樹荒烟過獨流若使鎮州存
佛乳關南誰遣作邊頭

佛乳事見王鞏隨手雜錄

油坊梨

北果品最繁堆盤媚南客蒲桃僧眼青蘋婆佛脣
赤棗皺撲滿筐栗小剖盈石此皆待露霜急就未
盡釋船過下油坊燕齊接咫尺沙村樹纍纍梨熟
號秋白斜陽射林黃登岸觀小摘幽禽啄易損芒
蜋穿不惜

芒蜋食果蟲也見抱朴子

數錢致連顆入手雙復隻

香清先破鼻膚脆待冰噀老夫苦肺氣得此潤關
鬲篙師利販鬻包裹動千百區區釘坐須關吏愁
橫索一笑聊朵頤無勞遠懷核

雨泊故城寄嶰谷半槎

不待迷途覺昨非扁舟寥落寸心違孤城風雨秋
更斷千里關河旅夢飛幸託良朋全遠志莫教慈
母寄當歸平生浪說交游徧更有何人重芟衣

小泊阿城鎮戲成三首

瓜壺磊落菜登庖七級名牖南浮到市梢真僞世閒
誰可辨家家門外賣阿膠

十六巫兒兩手摻相攜女伴話詰謏生來阿縞何
曾識自翦秋燈吉貝衫

麥熟還期歲有陳諧榆過後事艱辛舟中睡起渾

無賴說餅應須了了人

望蜀山湖

秋在無情有思閒扁舟輕載客愁還心隨飛鷺行
邊去一點波心是蜀山

仲家淺卽目

荒陂野水漫縱橫一片斜暉柳外明仲子祠前滴
秋翠鳬雲嶧雨晚來晴

淮城使風暮抵揚州

西風作意送行舟帆飽清淮碧玉流三百里程消
一日蘆花吹雪到邗溝

吳氏家藏十三銀鑿落歌爲蔚洲作

秋琴館裏秋窗拓主人示我銀鑿落一一數如琴
上星云是前朝季年作先世留貽手澤存石交介

壽心盟託文如絲髮鐫刻精製比商周彝鼎各歷
時知更幾晦朔請爲中金溯其略神禹梁州陳土
貢銀與罍磬齊磊砢先秦僅充器飾用漢興三幣
旋廢閣朱提大侵赤仄權唐始蠻鄉行漸博承安
寶貨鑄卽成金溪孝女冶曾躍輕齎利共粟俱生
變化無端累杯杓空傳白氏梅漿洗白香山寄銀
槩與裴侍郎
詩云重用鹽梅試洗看自注已笑韓公花葉鑠韓
昌
銀匠洗銀多以鹽花梅漿也
黎寄崔立之詩我有雙銀鱗其銀得朱提黃金塗
物象雕鐫妙工錘又云野草花葉細不辨蒼菜蔬
況當千古必爭地江左蒼黃事堪愕史相壁壘未
崩摧高家兵馬先焚掠此時鑿落何處藏鬼護神
訶免搜索至今珍祕深且嚴櫝以香檀謹局鑰二
分不敢醉明月十千那肯澆紅藥莫教惡客髻中
匿豈使貪夫市上攫因思古人銘彝器子孫永寶

宜虔恪君今持己等持盈沐浴詩書光燦若爲君
作歌歌思長祖德看君更恢廓

雨後同蔚洲登大觀樓望隔江山色作二
首

一片闌外帆帆外山藏雨秋翠忽飛來都染瓜洲
樹

逶迤青不斷潤州入昇州一重復一掩不掩南渡
羞

秋日懷旭瞻

漸水指家林秋風日夕深無書非是忘有夢卽相
尋野艇看山約僧寮問字心寥寥弦外意餘子漫
知音

吳甌亭席上食哈密瓜分韻

儒生守環堵封侯徒所羨云何几席閒伊州眼中
見伊州近燉煌瓜美不容選年年職貢餘賜出馭
娑殿形長狐得藏氣冷蠅早遣阿誰轉相貽及此
賁文讌漢家通西域聲教被月竈要知六師征詎
獨爲瓜戰衰年安儉腹登壠荷鉏倦差傳辰日種
適市取攜便并刀驚削寔甘嚼潭月片珍物匪分
宜躊躇不敢嚙

送全謝山赴蕺山書院山長

初寒官舫晚潮催知是經師入越來石簣雲深書
庫滿墨池風動講堂開西山餓後推前輩
謂劉念臺先生
東箭收將盡異才我憶舊游何日再爲尋屐齒尙
蒼苔

冬日重游大滌洞天得詩三首

筍輿歷歷數烟鬟霜榭風篁遠近閒二紀重來添
白髮九關依舊鎖青山有丹可駐壺中景無術能
謀世上閑卻笑范零開石匱塵緣未斷便思還

前身名在碧霄曾十月探奇喜未冰洞裏天低堪
倚杵崑中嵐暗盡篝燈山書字合仙人識風佩詩
非俗子稱尚憶當年腰腳健赤城有約試飛騰

尋真又過會仙橋萬壑烟霞閉寂寥谿碓自鳴疑
擣藥松風不斷學吹簫臭帑喚醒雲根夢小北來
爲帝所朝玉殿無塵漸零落紫芝碑在歲時銷

無塵殿供玉皇像猶元時備今漸頽矣有洪武十
一年洞霄新規記徐一夔文俞和書張昱篆額古

碑存者唯
此而已

步餘杭溪上謁凌將軍廟 吳凌統

茗源直下漱迴汀古社依稀記舊經共呂子明矜

戰伐與甘興霸作神靈夜嘶寓馬山行雨曉散祠
鴉樹見星欲覓遺苗何處是草閒部伍尙名亭

部伍亭凌統少時
鄉兵于此

題汪復園亭角尋詩圖三首

少日同馳翰墨場卅年飛電誤流光不論公瑾小
一月今看鬚眉各老蒼

城北幽居一水通荷香柳影冷吟中分明畫出陳

居士亭角披披兩袖風

亭角尋詩滿袖
風陳簡齋句也

老去酒兵元偶爾新來眉斧不相宜與君商略閑
功課長日唯消幾首詩

潞琴行

爲汪秀峯賦

高堂試解囊琴縛梅花紋斷龍池薄指爪拂觸鏗
有聲云是前朝潞王作神廟之姪穆廟孫

常

衣租

食稅居中原承平無事尚雅樂桐枝斲就除哇繁
一朝劇盜秦川起福藩兵死周藩水流離不惜青
珊瑚攜琴南向杭州止忽驚帝座隕天狼又見金
陵有立王擇長幸寬貶尉氏無人更肯奉貞陽史可
法欲立潞王不果天兵破竹長江渡蒼黃寧免崑岡
懼面縛開門救一城至今稱佛猶如故杭人尚呼王爲路佛
何處青燐泣野烟人亡琴在歲時遷吾儕共飲申
時酒此地仍傳戊日弦小篆銘文藏在腹兼金得
自街頭鬻誰將舊事譜滄桑彈出酸然不成曲

寒柳

酸風無復一枝新憔悴翻疑故態真葉落紛如汴
隄雨鴉棲瘦似灞橋人不將濃影遮游舫猶記斜
飄拂舞塵留得慶奴羅扇子烟痕挽住舊時春

題趙子固墨蘭

嶢谷所藏

廣陳之里幽人之居窈然空林有香猗如芳草無
言春風太初懿彼彝齋妙墨相於其葉則勁其花
則疎芝連質秀石抱中虛同心伊誰曰所南歟鄭
國服兮楚臣佩諸

題女士畫扇三首

漁川所藏

名同班氏最清華知道停雲是外家點染春心冰

雪裏只消葉底兩三花

趙雙鉤水仙

從來名士悅風流小筆蕭疎在扇頭一笠空亭行

跡少石城烟樹冶城秋

朱玉耶疎樹山亭

寥落江山發興新疎松列翠指通津閨中也自傷

秋旅寫出雙帆不見人

黃媛介江山秋帆

嶢谷半槎昆弟招游焦山取道霍家橋次

竹町韻

問訊城南路還同輞口尋江天遠不極雲日澹相
侵牛嬾仍眠壘鴉寒後出林重來水竹地情話愜
幽深

夜宿南莊

平生苦愛竹與梅西溪有約鉏蒼苔我行北地少
二友衣塵湔罷空歸來歸來復向韓江寓出郭雲
陰風色暮招要羣屐南莊游舊是梅多竹深處疎
林四面開茅堂卜夜須卜子夜長竹搖萬箇酒燈
綠梅放數花詩硯香彷彿西溪十八里月痕浮動
追春始江雨無端竹裏鳴不教梅影橫窗紙

焦山觀音岳晚望再用趙冰壺韻

手剔摩厓舊跡存江風爲埽凍雲昏山當落日如

爭渡帆向遙天欲倒吞絕頂僧棲同怖鵠空廬人
去有驚猿廿年三到緣非淺好掬清波洗眼根

時予

方病目

同作

馬曰璐

雲磴依稀屐齒存茅亭登歷海光昏音兼吳楚
人重到氣壓曹劉句早吞萬里奔流浮落日十
年清景問栖猿江山佳處歸長望嘯倚天風坐
石根

焦山看月分得聲字

焦山寺裏鐘始鳴焦山寺前江月生此時月上潮
復上風水相薄爲奇聲餘音瑟瑟獵枯荻磔然飛
起棲禽驚長波萬里入杳靄中流一道馳空明數
星莫辨北固火幾點不送南徐更羣峯隔岸悄如

睡何事賈舶貪宵行吳頭楚尾兼越角我輩聚若

九子萍

同游者九人

珉石興來弔鶴瘞瓊田望去呼龍

耕坐久起踏松影碎滿地窸窣霜華橫琉璃宮殿
水精域佛界盡在寒而清良朋偉觀那易得天教
今夕二者并高詠坡公赤壁句一尊酹月還同傾

同作分得月字

馬曰琯

十年不到浮玉山夢裏時時幽興發琴聲憶著
冷侵肌詩思尋來清入骨天公從古妒佳游未
必重登還見月今朝賈勇挂帆過正值晴冬寒
不冽夜深雲淨五三星浪湧潮翻逼銀闕望處
澄江徹底明吟成遠岫排空沒黃蘆苦竹舞平
沙驚起香林定巢鶻同行有客氣最豪把酒披
裘坐巖窟廣寒八萬四千戶要與江山助奇突

人生此境豈常遭拾得莫教隨手撇經窗且復
嗅梅花海風吹我蕭蕭髮

登雙峯閣分得翠字

香閣如危巢細路盤折至頗覺筋力衰不辨舊題
字爐烟浮江光帆影移竹翠此閒坐永日自爾絕
人事將爲禽尙游未免周何累歸歟復裴回短策
耐寒吹

同作分得山字

杭世駿

凌虛結遐覽一菴翠微閒石磴穿鳥道瘦策同
躋攀了了脩眉蜷遂見江南山喧濤舄下過白
雲窗中還清景迫短晷後游恐緣慳霜鐘發深
省鐫銘留孱顏

焦山歸宿南莊二首

江山奇絕足盤桓歸向梅花說夜寒一片水精菴
外月隨人小倚曲闌干

多少長安車馬塵故園空鎖一園春板橋修竹風
燈裏始覺林亭有主人

洪曲溪延清齋雅集分題得炙硯爐

一夜陶泓有凍泉故教移置煖爐邊清霜古怨辭
宮瓦茅屋春風夢石田勛策華林非躍冶句回枯
木不離禪先生笑著寒齋譜休比矮桑磨欲穿

開平王孫種菜歌

并序

常延齡字喬若號蒼谷開平王遇春十二世孫襲
封懷遠侯官南京錦衣衛指揮使有賢行曾疏劾
馬阮鼎革後與夫人徐氏中山上公之愛女種菜
於金陵湖墅裔孫執桓乞詩

高皇初定江南日采石磯頭功第一橫行十萬常
將軍帶礪河山永無失滄桑抱節有賢孫鍾阜秋
青入淚痕飄零大樹不復見顛顛故侯安足論中
山同志深閨婦曲折天吳移舊繡誰知偕隱灌園
人俱爲異姓分茅後幾稜荒畦非賜田晚菰早韭
資寒泉可憐一紙鋤茲疏卻裏長街賣菜錢歸來
偃仰棲衡宇猶勝貂蟬輿阜伍鳳臺園裏鬼迷花
雞鳴厖前狐嘯雨漫向金陵弔夕曛百年寂寂但
孤墳籬邊尙發東風菜一任空原野火焚

張漁川春草堂雅集同賦盆梅

船唇欲發未發梅意全舒半舒但覺室中香滿不
知池上冰初斜枝馬遠結法瘦格章泉課餘歸去
西湖千樹爲君落月踟躕

是夕予歸杭

次韻答吳葦村見懷

年來善病已衰徵無寸長如薙髮僧多謝良朋遠
相念試吟佳句恐難勝雲閒雁迴何人弋冰下蛟
寒未可罨觸撥孤懷當永夜爲君挑盡一窗燈

奉懷樊榭先生

溪南

吳鳳華

蔚州

脫屣浮榮嬾就徵前身應是寫經僧瘦如飯顆
吟尤苦清似冰壺冷不勝行繞梅花隨鶴跡坐
看山影落魚罨相思風雪湖陰路定對攤書竹
屋燈

立春前一日作

殘年不出戶試起繞階行上番梅開色斜陽雪滴
聲春回偏耐冷臘去有餘清辛苦西川戍兜零事
遠征

十二月二十五日同穆門甌亭汎舟至聖
因寺訪大恆上人用東坡臘月游孤山訪

惠勤惠思二僧韻

閒何闊高士湖

孫太初號西湖爲高士湖

歲云暮矣一事無出

郭見山已如笑登舟招鶴若可呼興來奚暇謀諸
孖白頭相覓塵外娛延緣到寺不十里愛此水曲
兼林紆沈沈千柱釋子廬阿師晏坐秀且孤清修
凜凜對雪竹妙句往往傳風蒲出家洵是大丈夫
徑山欽禪師語繩牀茶話午至晡復從絕頂望烟景洪谷
有手應難圖幾點綠萼破凍餘繞樹願爲蜨栩栩
挈音同訪鄰翁逋暗香疎影休重摹

孤山探梅用東坡松風亭下梅花盛開韻

扁舟喚渡尋西村

董嗣杲西湖百詠注云西
林橋爲古西村喚渡處

殘梅

零落誰招魂水邊尙有數枝在三花兩藥苔斑昏
高吟爲拜處士墓舊游只認孤山園江南春事亦
太早石闌坐覺生微溫空亭遠照一峯雪花鬚落
日如初瞰平湖鱗鱗峭風起城頭吹角愁關門作
詩清絕洗綺障舉似老宿知忘言探芳寄語後來
者明朝尙及攜匏尊

歲除日同江聲東壁甌亭游紫陽菴

趁閑同過羽人居怪石玲瓏玉不如江影一窗開
洞壑松聲滿耳接空虛鐘鳴塵界知春換棊罷仙
家忘歲除我已行年何子季比來百念轉蕭疎

何子季云吾年五十有七月食四斗米
不盡何容復有宦情予年正與之同也

元日試筆

以下
已巳

手搔短鬢感流年起向東方未白前後飲酒巡煩

杜舉少成文字笑唐捐壽親無量須依佛

老母今年八十

貧我何私莫問天跬步出門春浩蕩好詩都在柳梅邊

北郭歸舟卽事二首同江聲作

沙尾痕漸沒芹芽已可挑不見青山郭舟行雨瀟瀟似出新林浦逶迤向板橋

同舟得我友笑語烟際落人家閉暮色燈影穿叢薄歸路喜非遙漫畏東風作

春餅

新年今夕好入手愛團圓笥底禁風卷燈前暎字看園丁供生菜竈妾飭春盤不道來牟貴偏宜老

齒殘

近時麥價之昂前此未有

元夕大雪集汪秀峯真硯齋看燈分韻

落落城中幾弟兄春宵又作放歌行殘梅亭角燈
初上飛絮牆腰月自明甲子晴慳多望歲是日爲春甲子
鬼方天遠佇休兵老夫把酒殷勤祝到處豐年有
笑聲

春雪初霽同穆門葢林恆公汎湖得岫字
湖上四時佳最佳早春候況逢晴雪初招要詎容
逗天公喚滕神巧在阿香後十四夜雷風力峭能
留陽光消不驟故作冷淡觀少緩芳菲鬥花房鸚
破觜柳色鵝脫敷幻玉刻樓臺溼粉皴林岫中央
開碧鏡西子妝更秀心爲尤物移短句詠難就非
因侵曉來安得此邂逅

口占待得詩成雪已消足成一律

待得詩成雪已消滿湖新水動蘭橈夕陽紅送僧

歸寺山色青隨客度橋一笑閑名花市酒百年樂
意竹房簫繁華說盡前朝事分付高枝鳥語嬌

春雨齋居遣興

枯坐空齋聽雨聲春來景物似淒清苔緣古砌多
幽思草長閑門不世情尙子卦中知損益昭文琴
外悟虧成蕭然止足身無事驃騎寧高第五名

春分後三月初晴雪軒招同穆門蘭垞堇
浦汎湖分韻

載酒邀朋有范雲四山嵐影坐閒分放懷且喜同
鷗侶洗殘何煩對馬軍樂過中年天所借晴無三
日古來聞天桃正照清波影好揀繁枝插帽羣

堇浦招同諸公鳳凰山看桃花作

春情垂老春醅濃又被城南花惱公青山無賴澹

紅粉小雨野鶯啼故宮看花人去愁難寄一笛花
前何限淚來訪西天寺裏鐘碧蘚蝕殘蒙古字乙丑
三月六日顧丈月田招看花于此鵲詠烏龍古廟
中今下世已五年爲之泫然廟有元西天元興寺
鐘一口上有江浙行省平章達識帖睦邇題字并蒙古字經

穆門招同諸公汎舟甘村看花分韻二首
出郭烟光暖攜尊客意和花深隨水曲舟緩得春
多紅外山連屋青邊竹映坡何須話前度不厭屢
經過

並岸尋村徑游從興不孤繁枝側帽避落片倩風
扶美景難爲別時柳漁將入都村農也自娛主人稱老健
傾倒玉雙壺

大園上人惠紫菜補陀茶用山谷集中食

筍韻

平生嗜讀書枵腹但貯菜勞勞求益心屢問市兒
賣上人空味塵不羨萬羊宰挂席割海雲衣色共
難壞歸來包倭紙償我清淨債香山供高禪詩中
費薑芥取用及齋盂毋乃已傷介雷鳴候石鼎雋
永堪一噉伴以梅岑春松濤洗餘噫景純賦已收
鴻漸經未采

紫菜見郭璞江賦

二月十五夜泛月三潭同穆門柳漁竹田

恆公作

三潭人靜煙沖融茲游奇絕我輩同千金不買湖
月白一杯獨吸春山空柳邊花外有今夕銀燭清
歌無此風贊公房裏續前夢黃雞莫漫啼惛惛

晚入靈隱寺

次日吳君歐亭來遂同穆門竹田入山柳漁歸去

遂果西山諾來尋猿鳥羣斜陽隱春樹梵唱出香

雲佛坐莓巖徧人行乳洞分如何憩寂地衆籟一時聞

坐月冷泉亭贈巨公

經年不入山山月喜幽詣遂隨芒履行出沒峯嶺
際清光倒泉心瑣碎見松桂一輪澄孤圓倚闌勝
仰睇夜深春氣和微風扇明霽龍宮疎鐘斷澗響
續迢遞林僧愛迎客茶甌暗芳細何處雜花開石
路杖頻曳

寒食湖上冶春絕句七首

三日湖山爛漫游汀花沙鳥爲句留今年寒食閑
蹤跡半在僧坊半酒樓

清繞橋迴澗壑長春淙亭下踏春陽越溪一尺西
家髻壓倒吳中時世妝

猛雨豪風不奈何誰教龍忌得晴多桃花薄命成
僥倖腸斷佳人愛愛歌

頭白周郎發興真門穆吳家樂府劇清新亭甌肩吾詩

句神仙裔田竹盡與西湖判斷春

山滿樓空鷺浴翎行窩大好在湖亭凭闌斜日不

歸去吟盡浮嵐潑眼青山滿樓明高深甫別業在跨虹橋東今廢

新寺海棠烘臉霞兩株合得好詩誇老夫朝暮看

不足一任人嘲命屬花

踏花鹿女茜裙低二月蘇隄似大隄只有道人清

淨眼觀心久作絮霑泥謂恆公

題穆門虎丘中秋夜汎詩畫卷三首畫爲華秋

筆岳

抹月批風老更狂殢人燈火是山塘吳中勝事君

知否寫在周家十一章

老我吳船易感秋
秋燈秋月幾曾游
夜來多少行雲影
不夢閨中夢虎丘

如此中秋天下無
船船銀燭度歌珠
風林煙塔迷離處
除卻倪迂那解圖

寄沈椒園觀察萊州

河畔相逢跡未遙
使車聞又出中朝
戶盈左海齊三服
政洽東隅漢六條
瘦格幾回憑落月
高吟何處託歸潮
故人依舊耕漁侶
時望音書問寂寥

次韻奉答樊榭見寄

仁禾

沈廷芳

椒園

卅歲相思碧海遙
先生南返我辭朝
夢回梁月聞雞唱
香滿湖花發藕條
貧裏預籌游岳屐
老來縱筆浙江潮
耦耕行踐秋莼約
無盡意齋

吟沆寥

舟過橫里懷平松兩先生故居

并序

平顯字仲微杭州人洪武中官廣西藤縣令謫戍
滇南沐國公英延爲西席故居在北關外之橫里
地有仲墅洛山水名十二里漾松雨軒集中有句
云萬頃水雲橫里北百年正隴洛山陽又云藕花
官漾十二里桑蔭鄰村數百家又云水竹空思仲
墅村至今過之風景宛然惜乎先生之不能終老
于是也

出門天宇晴暖風吹我衣片帆一何駛沙燕相隨
飛不斷故鄉山新綠初生肥謝村已回首仲墅望
依依寬漾十二里中有詩人扉幽棲如此少遠戍
竟爾違桑陰看浴蠶草舍聞呼豨當從田父飲莫

數季女飢

雨中過鶯脰湖

釣徒何處訪元真
來往江湖浪跡頻
青草綠波如送客
斜風細雨欲留春

冶坊浜與竹田別

曉別一聲啼鴂
春愁幾處人家
記取綠陰流水石
楠似雪初花

賦得未到曉鐘猶是春

韓江雅集

春歸何處更相留
且酌餘花藥玉舟
明燭心還惜芳夜
曉鐘聲莫動離愁
低回元相驚
獨句停待景陽梳
髻樓漫道千金酬
一刻千金多恐未
能酬

聽懈谷半查談泰山之勝

天孫迴出名山羣
奇游歷歷今始聞
紅塵遠謝日

下客白石高揖雲中君古來禽尚幾人共雨後秦
吳一髮分老我曾吟望岱句胸中空翠猶氤氲

題張漁川所藏周昉宮姬調琴圖

天寶宮中尙歌舞三郎天縱工羯鼓廣平留下朋
肯聲寧王抄得龜茲譜小部箏琶競追逐雅樂當
時棄如土趙州長史用意良貌出嬌嬈素琴撫淡
妝相對花下聽低鬟背面尤娉婷一時何處有三
粲霧閣雲窗深杳冥關雎本是房中曲不比等閑
操汎祝好將解穢謝君王願君解愠四海康

雨中汎舟過篠園三首

三日邛溝雨能添打槳聲紅荷如欲語白鳥故相
迎

水亭布硯席初蟬流碧樹菰蘆積無邊不辨來時

路

微雨或時作鄉心何處消垂楊拍新漲煙艇第三橋

夏日田園雜興

韓江雅集

綠陰門外亂鳴蜩畏景偏於此地消秧動風畦初足雨荷翻露港慢通潮聲高與客聽芸鼓味苦呼童種酒瓢無事牽牛著涼處輭紅十丈自然遙

立秋日作和陳授衣

春殘一舸到揚州歲序無端已半周安隱鉢單僧過夏蕭條風雨客迎秋病餘稱藥煩賢主伏後嘗瓜憶故丘柳巷南頭詩老在全家住久尙鄉愁

杭州人家揚州之柳巷

哭查蓮坡

燕南耆舊久相推會面俄成萬古哀漫浪虛充選

人去淹留直為訪君來序去乾坤劉尹誰知我湖

海陳登未易才老淚臨風何處寄手書猶在忍重

開蓮坡于歿之前八日猶以手書寄未幾而凶問隨至矣哀哉

蕭照中興瑞應圖曹勛贊并書明吾杭陳瓠菴故物今在廣陵吳

氏

趙家九葉承平業乾坤初換紅羊劫鑾輿哀痛塵

再蒙自此中原滿兵甲肅王已去康王留神人助

順先磁州即真當念衣中詔避敵翻為海上遊艱

難百戰英雄死小朝廷在臨安矣迎得慈寧阿母

歸不負黃羅卜棊子太平功就稱翁翁紹興閑禁中呼秦檜

為太平翁翁見賓退錄西湖歌舞驕春風倦勤竟受天下養

瑞應圖呈德壽宮蕭郎曾畫延祥壁蕭照奉勅畫四聖延祥觀

壁見四朝聞見錄

六百年來撫真蹟中閒李固渡頭冰彷彿

扶持光武厄臣勛書贊官職俱北狩見聞非貢

諛曹勛有北狩見聞錄

何如元叟浯溪頌漫比簡子常山符

魏景初帳構銅歌

狀圓如簞徑一寸長四寸許中空而底方旁出

歧枝有孔上有字云景初元年五月十日中尚方造長一丈廣六尺澤漆平坐帳上

廣構銅重二斤十兩凡三十二字八分書刊上方西疇所藏

霸城月照仙人淚不逐魏宮翁仲二銅駝久作劫

灰飛帳構猶存景初字洛靈兒愛芳林好奪得蛾

眉供灑掃弭殫想像薄羅風傳與千年尚方造流

蘇翠羽光零亂土上出金妖讖換見王子年拾遺記

文成

石馬大討曹水吐玉螭纔效漢碧簫平坐朱竿密

八分應認仲將筆

魏明帝宮館寶器皆章仲將書見太平廣記

摩挲彷彿

佛陵雲臺小縮波浪痕勁無匹更聞昭烈能自貶御

用都歸銷鉛燄

南史崔祖思傳劉備取帳構銅鑄錢以充國用帳構銅之名僅見于此

一枚古色出重緘留向人閒鑑奢儉

秋懷

落魄江湖鬢有華秋風又入小窗紗無官張祜詩
名賤多病休文藥力賒慈母耄年忻善飯阿宜弱
冠解塗鴉新來只有團圓想猶及中秋可到家

次韻張嘯齋同舟渡江之作

依依老柳拂汀洲我賦將歸君始游風月西湖如
有待烟波東道若爲謀烏絲剡紙蠶頭字白紵吳
歌鴨觜舟自是高人情調逸笛聲吹過一江秋

同嘯齋西疇暮游惠山至泉上

落帆楊柳灣暮色黯已動信步入幽翠山影正如
夢重來非昔儔光景不可控沈沈泉涵甃漠漠雲

栖棟崑桂何處開妙香時一送不逢片月生風弦
爲誰弄

惠山下與西疇別

人生客路惜離羣笑語連朝得共君須記並船分
袂處僧鐘茶火隔秋雲

哭周穆門

如君行誼友兼師一慟秋風草木衰徵士東岡有
周燮稱兄南國只袁絲萼鱸不返松江櫂山水空
留汝社期僂指交情三十載九原無路說相思

大理石屏歌徐陶尊索賦

石屏高二一爲山高月小一爲水

落石出蓋天成景也

坡公會賦後赤壁妙語排空江月白多年無人更
收拾幻入點蒼山下石公之遠遊唯儋耳異域未

踰大渡水山靈豈亦愛公語不似紛紛舒與李徐

公清溪結草堂

尊公象求少尹

琢屏雙插堂中央有時高

枕臥其下夢作孤鶴橫江翔前身恍忽居臨臯絕

境高唱爭清豪五郎押韻斜川曹

陶尊行五

寒光一點

襲吟袍蕉嶢欲踏三山鼇雅勝巫峽翻雲濤不用

抱遺撰志金粟詠

元松陵謝氏有巫峽雲濤石屏楊廉夫爲作志顧仲瑛爲作詩

我爲長歌聊賀茲石遭

題陶尊綠杉野屋圖

手種絲杉百本餘舍亭山下閉門居南州高節渾
相似北路風流笑不如清籟含霜朝几靜翠幢承
月夜窗虛主人只恐棲難穩早晚讎書向石渠

九日送西顥之武昌二首

今日一樽酒壯君行色無登高何地是送遠更心

孤樊口波濤落怡亭木葉枯應添感秋句重疊付
奚奴

明時身不試軍府惜蹉跎月尙南樓好人逢上客
過飛牋流翠墨開讌倒金荷應念衡門下西風獨
養疴

初冬命園丁修剪花木有作

平生只合閉門居寒事于今亦有初荒穢頓芟聊
復爾芳菲可待且姑徐斲苔預爲移梅地掃葉堪
充煮茗儲老去庾郎最蕭瑟小園賦就欲何如

朱母陸氏旌節卷

青燈絡緯動悲吟撫櫬提孩兩不禁鄰火滅時飢
火忍烏頭全是表冰心

全謝山喜飲苦酒詩以嘲之

大戶飲嗜辛小戶甘是取君戶大小閒奈何好飲

苦前身天酒星匏瓜乃爲輔生成東野腸

孟郊詩食薺腸

亦

百觚堪一賭剝檠供釀材咀苓付麴部

說文大苦苓也

醉中不攢眉起作鵲鴿舞其味盡入心驅向筆端
吐詩苦與俗違文苦致身竇五行性有偏惡旨詎
勞禹祗應獨酌謠添入竇苹譜

月夜

乍霽初冬月團團出女牆明收一旬雨清釀五更
霜入竹禽驚夢侵莎蟄閉房今年餘兩度深惜此
流光

同董浦謝山北郭閑汎

人生難得是冬晴隨意河橋撥棹聲縱不成游偏
有伴偶然欲出豈無名因看黃葉商行止爲愛青

山當送迎歸去只愁僧舍客把詩吟向佛燈清

謝山

時寓僧舍

南潯田烈女詩

儂住潯溪上郎家共里閨掌珠祥入夢冠玉弱知名半面期幽壤雙飛誓隔生朱絲曾約髻畢命託精誠

長至前一日得沈椒園萊州書并惠艸段
阿膠卽次去年嶧縣舟次見贈韻奉答二首

髯奴書到一陽時千里冰霜接夢思宦況知君清似水窮愁泥我亂如絲冬堂贈疾煩村硯曉寺安禪禮導師只此便應爲近狀疎蕪筆硯報章遲
山林鍾鼎不同時誰爲殷勤繫遠思海內朋交存

臭味卷中詩句叶金絲并膠舊在酈家注毛布曾

傳孔氏師

阿膠見水經注孔傳織皮毛布

肺氣寒天須底物感深

不道寄來遲

雨中過安隱寺寄吳甌亭

寒雨跼蓬底經過古道場雲連山懵懂松罨殿荒
涼舊酌名泉冷追思去日忙何當約雙屐重與試
旗槍

同張龍威訪陸南香北墅

北墅幽棲處閑尋野鳥知風廊行落葉烟閣俯空
池官罷天教逸詩成客詫奇此中多樂地漫白幾
莖絲

集南香齋觀窗上樹影聯句

日晷近西南照此窗上樹

龔

同心集二三斗室坐

和煦

陸震光
芳谷

疎枝幻自交，虛櫺晃如赴。

陸錫周
澹予斜

看鳥漸移空，想雀難駐。

張元叔
華峯

濃淡染匪真，動搖

畫亦誤。

鶚

借問何因緣，兼以寒飈故。

陸培
南香

題馮績困無波艇

規制分明六扇篷，窗開麤設小闌紅。
長依茶竈筆牀畔，時泊疎花瘦石中。
大地四游俱在水，人閒萬斛那禁風。
爭如安穩家園樂，只把詩筒當釣筒。

奉答當湖吟社諸君折梅贈行之作

客身似葉東湖濱，北風十日吹倒人。
明窗深爐作詩供，一枝烘蠟爭鮮新。
歲寒之交味禪悅，贈我幽香媚冰雪。
諸公送者自崖返，相對蓬籠如未別。

送樊榭先生載梅歸杭

鮑詢

先生興欲乘歸帆，寒宵共聚深杯銜。
殷勤何物

可爲贈花字罄口春風緘春風未轉交三九月
落篷窗香在手西溪別有雪千林一枝還肯寄
儂否

同丁龍泓過潮鳴寺訪大園上人觀戴進
畫功德諸像立軸殘本

城東結游侶殘臘得清暇忻茲後梁寺復駐南宋
駕冰釋魚尾莘林疎鳥鳴沙菜甲畦稜斜山影屋
頭亞旁闖白竹扉中啓赤華舍上人此安禪苔榻
句無價雨深苔到榻糧欠語及戴畫蹟塵網解包
鶴辭籠上人句也乍迦文失莊嚴天女尙姪姹冠花凹凸裂衣葉披
翻罅散脂藥义徒戈鋌儼欲下又寫屍陀林枯骼
瘦堪怕圓勁意猶存精彩炯相射當時修門召畫
院定雄霸贈詩雖有楊士奇被放無奈謝廷循人往三

百年一藝妒堪咤冥搜作佛事舊觀隨元化聊爲
柯古述歸翦寒燈夜

冬日同雲亭江聲甌亭竹田集吳山延慶
道院分韻

丹房重到路依稀共倚闌干客思微半郭樓臺橫
杳靄一湖林岫入烟霏天將雪意供詩本梅送寒
香上道衣安得憑虛吹鐵笛坐看人世玉塵飛

樊榭山房續集卷七

樊榭山房續集卷第八

錢唐 厲 鶚 太鴻

詩辛

新正三日同東壁甌亭竹田集吳山延慶

道院分韻

庚以下午

始春事登臨麗矚與前別窈窕開崑楹自擅山水
窟一鏡瞰澄明千峯俯環列浮嵐氲欲動遲暉耿
難滅馳心爲輕舟孤嶼轉沿越乃知仙家事靈境
坐超忽茗餘幽鳥哢吟次閑梅發相要問黃寧予
將鍊華髮

早春同人集讓公南屏山房分韻

空山春事早幽思集虛櫺梅萼分湖綠茶煙出竹
青林暄宜曬衲石潤罷翻經愛接支纖語真忘物

外形

新晴探梅南屏山中同江聲龍泓讓公作
爲問梅花信高僧領客探笛聲吹不到鳥語靜相
參春竹孤香抱晴湖一碧涵翻思前夜雪無路向
山南

題華秋岳浴鵝圖

曇礪村中我舊過
噴船無力困滄波
近來頗厭書生幻
不愛籠鵝愛浴鵝

題友人北墅耕讀圖

人生良計無如耕子真
谷口垂高名人生至樂無
如讀莊叟曾云學爲福
好學爲福出逸莊子
從來二事合併
難耕今求富讀求官何如
九年之耕十年讀悅心
果腹相盤桓君家歸錦橋
西住北墅連延夾城路

白蕩波通柳外村秦亭翠見烟中樹頗聞卜宅先
誅茅買田繞屋書成巢自資地利鄙悝鞅每探古
義窮媧庖文度佳兒美無匹膝下承歡堪永日閑
將耕讀作貽謀輟耒荒經俱有失幾時汎艇過幽
居擬趁紅荷銷夏初瓜圩菱港經行徧蠶書蟹略
鈔謄餘吟聲未斷農歌起悅忽置身圖畫裏比鄰
近喜有同心我詩請示茨簷子

過南華堂追悼谷林

故人不見已三年重到池亭更惘然悵望殘梅點
殘雪空餘新柳舞新煙塵凝石畔藏書庫雨損隄
邊送酒船何處風流未消歇幽禽留客語清圓

金江聲吳山志成詩以落之

窮塞馳驅返故林煙霞興在老逾深掃除問舍求

田計校檢模山範水心強至里中添故事

宋強至吳山里

人君居同之

伍胥廟下續新吟春來雨阻同登約手把

青編子細尋

爲堇浦悼亡姬

知君急淚制無因客舍驚聞玉化塵夢斷畫簾微
有雨歸來錦瑟但如人碧桃落盡空留子白髮生
多最苦春想到金臺定情夜殘燈向壁喚真真

二月十五日同人展周兄穆門墓于湖上

之青芝塢用皮襲美過張承吉處士丹陽

故居韻

何方清佩逐飛霞埋玉空山重可嗟墓下驢鳴猶
有客松陰鶴返定思家百年大雅存吟草二月東
風滴酒花猛憶去春同夜汎短篷曾繫水西涯

去年

此夕同汎月
三潭各有詩

汎湖歸舟遇雨用前韻

陰晴無定驗朝霞零落還因故友嗟
社燕來時初上冢林鳩啼處各歸家
山容正媚偏逢雨酒價初高只爲花
老向太平行樂地一枝柔櫓是生涯

寄吳鳴臯

同岑渺天末夢去春芳歇江通瓜步雲樹隔蕪城
月之子神何清相望空復情二十擬文賦半千期
令名姱修寧有已餐勝方今始三歎北游詩不負
琅玕紙

次韻奉酬樊榭先生

溪南吳鳳翔鳴臯

幽澗鳴春泉泠音殊未歇忽枉瑤華篇若對松
際月月明風復清鶴望含遙情麈尾不輟講鈞

竿難避名雲山莽未已攀陟何時始吟成且寄
懷自寫松花紙

同江聲東壁甌亭登吳山西爽閣

樓倚吳山好新晴一笑佳春湖留遠眺名岳貯奇
懷日隱雙峯晦風喧萬樹霾呼童掃苔石題字記
曾偕

西爽閣聽施鍊師彈石上流泉

天風吹春沙眯目阻遙望道人山下返如鶴息青
嶂手拂落霞琴爲我譜幽貺一彈初滴瀝再彈復
跳盪淙潺七條水直瀉磐石上中閒鳴咽處微有
松聲颺近疑雙磎流遠接三峽浪滌塵耳更清破
睡神覺王從今雅弄名不數柳文暢

趙氏西池看海棠同施自勗作三絕句

花中戚里此稱奇，淑態穠姿想見之。莫笑杜陵窮

相眼，麗人行卽海棠詩。

丘濬牡丹榮辱志以海棠爲花戚里

亦復奇顛擬放翁，名園可惜鎖東風。與君臨水偷

看處，定愛深紅愛淺紅。

白頭那更有風情，撚斷吟髭太瘦生。何意一枝禪

榻畔，宿妝殘醉伴清明。

陋巷

陋巷無來往，深棲幾歲華。犬能憎俗客，燕肯戀貧

家。遣日書從借，經春藥尙賒。曉風偏解事，吹放一

林花。

大風

已惜花將盡，飄風似少恩。兼聞屋瓦振，直使釣船

翻。病骨應難敵，春愁孰與論。微明聲稍止，墮雀尙

餘喧

城曲

城曲村非遠春深草正薰池萍生穀雨牆竹翳桑
雲鳥散齋鐘罷風來戲鼓聞地偏神貺古童稚亦
欣欣

吳長公自梁溪移家來杭用沈陶菴題石
田有竹莊韻奉簡

高人雅愛城東住與我棲遲共一川相望無多春
樹外經過只隔野橋邊栽花更闢三三徑煮茗休
尋二二泉爲話越游吟興在涼秋重泛鏡湖煙
玉露周益公訪楊誠齋于南溪詩云回環自闢三
三徑尤玘萬柳溪邊舊話兵侍公棐于許舍山中
鑿地得泉不異二泉名之曰二二泉蓋在梁溪也

晚春感興

水外茅檐竹裏扉
閑窗人靜試單衣
壓枝梅子多難數
帖地楊花弱更飛
白日如年娛我老
綠陰似水送春歸
如何尙著齋鹽累
又理雲帆別舊磯

題新市映碧亭

白魚買就午炊遲
映碧亭前小泊時
閑卻東風一溪水
惜無人解弄漣漪

璉市

東去含山遠西來盡
水鄉藤穿橋脚古
溪繞市心長白髮逢
挑筍青裙出采桑
人家濃綠裏應笑客
舟忙

晚次陵口

齊梁陵墓所在

綠徧千村叫杜鵑
餘寒猶未脫吳緜
暮雲青草夾岡埭
春水小風陵口船
舊事六朝殘夢外
客程十

載夜燈前白頭不奈閑愁攪擬向空門問老禪

題文待詔石湖詩畫卷二首同嶰谷半查

作

吳中佳處我曾知十里青山塔一枝潑眼湖光飛
鷺外無聲寫出范村詩

桂花香裏此夷猶細雨平橋負好秋瞥見停雲小
平遠依然還我舊扁舟

丁卯仲秋過石湖
欲作一詩未果

茅司徒廟迎送神辭

并序

廣陵蜀岡平山堂畔有茅司徒廟相傳神五人茅
許蔣祝吳其姓也茅名勝異姓約爲兄弟過谿旁
見一嫗共母事之嫗爲虎食五人奮力殺虎地自
是絕虎患予案南史梁王琳爲陳將吳明徹所殺
故吏朱瑒等請於陳徐陵還其首葬八公山側尋

有揚州茅智勝等五人密送喪柩達于鄴通鑑揚州作壽陽是時以壽陽爲揚州也琳舉兵平侯景遭時多故閒關異國欲以存梁而卒死于戰五人非親故能送其喪柩還齊誠義士哉當時江淮閒思而祀之隋封司徒廣陵之廟最著者以宋紹定中有陰殲李全功也母嫗事近不經驅虎之說或有之韓江雅集同人爲迎送神辭分得此題因爲辨證如左使事神者有考焉

絙弦兮鼓籠銅飛雨兮江岫東戈彗野兮旗燄空神之從兮建寧公青林兮望篝火於菟兮弭道左八公山側兮三臺下雲車未來兮我心苦

斗野平兮煙冪冪佇連蜷兮夜吹笛殢新塘兮銳頭兒回風颯兮降毅姿福我氓兮大有曷報之兮

昔酒神醉止兮歸無方淮月升兮明古柳

賦得滿天梅雨是蘇州送梅泝自京師歸里

濃陰風雨溼模糊五月抽帆返舊吳驛路三千行
已到畫橋四百望如無涼生白紵虎丘寺響入綠
蓑鶯脰湖此景較量燕地少不妨賀鑄老菰蘆

哭汪袞江

自失蕪城友於君計已三

謂余葭白程松門先歿

論交存重

諾經世付空談衰白公榮酒悲黃成式函寂寥那
可見揮淚滿江潭

京口聞蟬

五月二十六日

兩月鄉心不自聊雨絲初歇早乘潮一聲知了來
何處正在詩人丁卯橋

六月二十二日雲亭明府招同鹿田江聲
諸君集復園分韻

鬱鬱連朝不可任得來池館洗煩襟隔城山雨到
荷葉度檻野蟬嘶柳陰早瘡已隨紈扇減晚涼應
共茗杯深清風攜自蘭亭長只有閑鷗識此心

秋暑同陸紆齋張龍威葉迎坡孫剡舉集
讓公南屏山房分韻

八月生衣未放閑城中無處散疎頑同來此地真
逃暑自笑多時不入山佛坐苔龕疑雨過僧歸竹
戶倩風關扁舟載得涼多少更與秋荷約往還

九日望亭舟中

辛苦陰霖歇蒼茫野色秋百年渾作客九日又扁
舟多病黃花避長歌白鳥留從來望亭驛煙樹迴

含愁

大風渡江望金山

風雨翦江去漁帆恐不禁濤聲俄上下山勢若浮
沈金碧疑神力虛空見佛心回頭驚定處畫裏記
登臨

入瓜州城愛其多水竹之趣忻然成詠

收港蘆分界城隅進艇初平生苦行旅隨地愛幽
居潮水侵籬滿江雲入竹疎誰家開草閣借我著
叢書

次韻答吳梅查見寄

水國初寒雁叫霜詩來便是接清光五塘野色歸
秋卷千里離情寄夜航淮海風流君未老湖山隱
興我偏長若爲更約林中侶

謂葦村兄弟

缸面同傾話

草堂

奉懷樊榭先生

溪南

吳

均

梅查

山葉丹黃乍染霜
高樓遙憶對湖光
興來納翠開虛牖
病起探梅上野航
曾把新詩冰雪淨
爲尋幽夢水雲長
何時得挂輕帆去
問字閑過舊草堂

臘月十一日同人集堇浦桂堂爲恆公四

十壽

時恆公住持上天竺寺是日爲堇浦作山水小幅

西池雪後漸春融
香飯初炊祝遠公
乳竇雲堂新法席
竹針麻線舊家風
畫分山色來湖上
杖帶泉聲入座中
知有大千歸掌握
長年應與辨才同

庚午除夕

散材寂寞又逢春
六十明朝是幸人
猶子麤完尙

平願餘年喜作老萊身薄雲淡日商量雪翠柏黃
梅點綴貧夜半無眠聽爆竹詩情除舊要從新

元日對雪

以下
辛未

閉戶焚香宴坐中舊寒著意戀東風無人可造真
閑日有雪相娛此老翁竹色低迷三徑白松明張
王一爐紅朝來凍筆呵初試學寫宜春帖未工

同江聲可堂龍泓游吳山分得開字

游人爭上最高臺吟賞還輸我輩來白髮登山猶
卻杖青春入手莫辭杯夢中鼓吹元宵過煙外江
湖望眼開爲避香塵尋曲徑洞天寒護一林梅

雪晴寄可堂龍泓

元冥奪春三日雪雪晴日出寒逾嚴爐溫覆手未
忍別裘敝裏身無可添玉立數峯在北戶泉垂幾

滴當南簷西溪梅信行復動野艇料理詩瓢兼

同吳可堂河渚探梅

渚中有渚吾舊句三年重問梅花渡人不看花花

看人鄭老周郎已泉路

筠谷穆門皆昔看花侶也

同行詩客比

水曹情與梅花如肺附初過石函三兩株旋轉法
華千萬樹遠簇漁汀未銷雪近遮山屋才開霧香
來竹外逆風聞枝壓橋邊捨舟步繁花亂插天作
紙疎影橫眠池是譜縱饒畫手有湯楊那比春工
多活趣平生萬事苦蹉跎花趁晴看亦遭遇微吟
西日爲予遲游蹤又逐寒蜂去

西溪山莊重有感

長生何藥試紅爐揀盡溪山住得無芳草不知人
事改寒梅半逐世情枯洗妝閣圯辭春燕吹笛廊

空有夜烏剩取曲池堪照影幾回閑遶更躊躇

夜宿雲溪菴

明仁和徐繼恩字世臣崇禎壬午副榜注名復社鼎革後

爲僧號偃亭菴其所制也

行盡梅花曲曲溪溪深何處辨東西入門初見佛
燈上高枕不知林月低逸士染衣曾結社幽人疥
壁漫留題春來頗愛參禪味曉起呼童斲筍泥

雨中肩輿至永興寺看綠萼而返

籃輿軋軋傍溪隈野寺看梅又一來舊壁詩憎山
雨敗危樓花遣午鐘催兩朝雙幹江南少碧蘚青
鬚竹外開折取尙愁添口業誇人載得綠珠回

同紆齋龍威登寶石山麓望湖復集昭慶
寺僧房分賦

輕陰無雨亦冥濛出郭招尋一望中橋外人歸山

罨畫柳梢船度水浮空年光會計春將半笑語留
連跡偶同莫忘僧坊幽事在酌泉燒筍落梅風

聖駕駐蹕西湖恭紀一律以當衢歌

化日嬉游鬢已斑野臣何幸仰
天顏因遵

祖訓巡方舉爲奉

慈闈 賜粟頒羽衛參差依弱柳簫韶和協繞春

山

君王要與民同樂 特許三門夜不關

三門錢塘湧金清波

也

邗上逢張浦山卽送其重游大梁兼寄桑

弢甫

秀州城下張居士握手邗江語不休畫裏看山殊

傲兀詩中說餅亦風流

詩以與毀甫說餅長歌見示

馬卿謝病

誰知己杜老登臺豈壯游若見故人相問訊爲言
憶遠雪盈頭

六十生日答吳葦村見貽之作

我生少孤露力學恨不早孱軀復多病膚理久枯
槁干進嬾無術退耕苦難飽悵下第溫岐歸敝廬
孟浩風塵恥作吏山水事幽討結託賢友生耽吟
忘潦倒流光去若馳年境已至老

禮六十一日耆賀
場云至也言至

老境也

贈言感君意璜琮藉文縑生辰與我同壯盛

君自好君如初陽升積漸滿晴昊我如炳燭微餘
光近衰草榮名無足憑里曲豈堪寶三復誦君詩
慚汗滿懷抱

壽樊榭先生六十

吳鳳華

先生閨史辰五月冀吐二余生較大晚亦此日
墮地聞今周甲子賀客接跡至爲重富文辭胸
中七經醉品格如孤松有勁直無媚 盛世右
文儒笙典堪鼓吹獻賦聲摩空一發偶不遂飄
泊孝廉船道腴豈憔悴靈運游山詩字字溼寒
翠可以傲神仙何必有名位伊余困塵縛妄欲
窺金匱懸殊實徑庭生朝枉相類一笑甲辰雌
足以徵古事惟祝享脩齡庶得蠅附驥

嶰谷寄鶴天寧僧舍有作同人和之

剪翎輕別閩風巔復恐翻飛計未全也識長身非
近玩且教仙質伴枯禪三花樹下容聽偈九杞山
中佇買田

孫太初養鶴南屏許相卿爲買田于九杞山有鶴田券

此段高情

消得否一聲叫破石堂煙

爲商寶意悼亡妾環娘次韻四首

珍微宋版印

茫茫愛水正無邊
曾說佳名玉字連
解後那堪成
夜恨循來猶記困
春眠依稀朱鳥窗
中事短折霓裳曲
裏年倒瀉天河作
平地人閒終不罷
相憐笄年拜壻定
無差誰道開花早
落花今日煙波司
馬淚當年風月翰林家
髻雲翠減傷瓊樹
臂玉香消失綠華
可惜寶陀勤禮處
不求共命作頻伽
騎去青鸞入杳冥
檀郎從此號商星
草名懷夢真成幻
衣可招魂豈有靈
弟子尙留吹了笛
侍兒忍捧誦殘經
扁舟共汎尋常事
腸斷東風檣李亭
從來薄命是佳人
槿豔珠漚莫認真
歸葬稽山終化土
前生瑤島本無塵
可能消領詩中意
何限低回畫裏身
官路多辛頭白早
知君不復更尋春

挽方環山

別時君善飯驚見素帷陳水逝悲同甲松摧失俊
人文章秋卷冷粉墨夜臺新舊贈營丘筆今逾付
襲珍

曾作臨平藕花圖及
做雲林小景見貽

早秋同近人授衣于湘集天寧寺具公方
丈同用東坡病中游祖塔院韻

漠漠空林散佛香斷雲吹雨一天涼客臨流水心
都淨僧自鄉山話更長解夏有期思本寺打包笑
我倦諸方食時五觀今參得慚媿秋蔬此飽嘗

集易松滋半厂書屋送蔣秋涇還樵李

同作蕪城客離情忽不任浮雲三塔遠落日大江
陰主禮秋菰翦賓筵夜燭侵歸橈予亦近相趁早
潮深

汪巢林八分書歌

少陵論書得其真曾云書貴瘦硬方通神昌黎論
書有深意苦道羲之俗書趁姿媚由來八法壞六
書二篆微茫竟誰嗣八分元從二篆生強被歐陽
呼隸字漢人近古無差訛流傳後代已不多郭香
察書久埋沒武梁畫像今銷磨任城五碑蟲蝕蘚
泗水九刻龍騰梭巢林居士老好事典衣不惜窮
蒐羅手摹心追筆成冢坐臥三日難同科腕懸仍
似蠶頭篆筆磔稍存隼尾波只餘瘦硬乏姿媚每
受俗眼相譏訶興來爲我書數幅奴視唐朝韓擇
木豪家屏障豈相宜挂我脩脩竹閒屋

樊榭山房續集卷第九

錢唐 厲 鶚 太鴻

詞甲

梅子黃時雨

梅雨

枯坐幽窗賺輕夢破時驚響荷扇正濃綠墻頭金
丸堪薦想到一犁江上暝愁將入吳雲遠淙潺徧
吹笛夜船燈影遙顫深院殘寒猶戀漫妨他燕
乳簾暗慵卷柰掃壁看題蝸偷銀篆依約紅綃香
潤句韞羅應竚沿階蘚風微便樓前鏡波深淺

摸魚兒

和葑田病耳

甚年時楚江寒早病懷偏惱孤旅悠然自喚空閑

字瘦影幾番回顧難寐處也省聽敲窗暗葉穿階
雨殘更漫數總付與醒眸青燈素被渾未減愁緒
人間世幾箇知音伴侶幽蘭淥水休譜祇應不
了枯禪味聞性卷荷猶貯凝思苦問隔屋釵聲可
是忘情句因君小住向無想山中飛塵浣斷相約
枕流去

瑣窗寒

初夏同葑田松泉過深柳草堂

戶小關雲城高縋碧嫩陰搖瓦何年種柳正憶漢
南游冶想依依香綿褪時繡鴛不到閑庭榭付餘
花倦蜨橋痕簾影伴人情話疎野連漁汊聽笛
弄滄浪悄然歌罷離蹤似寄頓冷故溪吟社笑輸
他桃根渡頭載來翠峯偏淡寫看籬根艇子縈回

任取浮萍惹

天香

薛鏡

藍浪浮花青銅淬彩空明大好無翳樣巧裁菱面
平揩粉不數尙方新製吳船載取縈繡帶疑迴鸞
翅低挂蘇潭片月如描弁峯晴翠 華年誤人似
此杜郎看鬢絲難避幾對淺渦梨暈笑臨秋水勛
業平生付與最愛是長宜舊銘字聽罷懷中窺餘
睡起

水龍吟

漳蘭

海帆吹送瓊姿一番又拆秋前信雲衣嫋嫋冰心
的的高情占盡著意扶持青瓷架小素甌茶嫩向

風亭水檻炎光不到。搴香夢、今纔準。可惜幽芳
易近，有誰知。楚天閑恨逢迎，只許靈均水佩湘娥。
烟鬢驛荔程遙，蠻花種杏，不堪重問。試山空露下，
瑤琴獨按，寫深林韻。

摸魚兒

芡

趁平湖采芳艇小。荷盤初沸，烟雨釵莖靜。照涼波
影，不比脆絲纏露花點。注看傾盡斜陽幽意，憑誰
訴。西洲倩女，訝碧臆纔翻青，吭漸滿脈脈水天曙。
明珠剖誰道，暗投無誤。鮫人何事相妒。攜來菱
市瓜塍畔，猶著宮黃深護。論斗煮，算風味親嘗，只
有涪翁語輕圓。薦俎早，滎繫心期，春蔥膩雪，巧夕
翦燈處。

齊天樂

絡緯

夕陽纔作

去

微涼意幽窗便聞秋紡怨緒回風情

絲曳雨交憂依然搖颺離悰記往在楓葉橫塘豆
花深巷翠股斜敲蕭蕭又送去年響何人聽時
較早舊啼銀燭背寒素無恙染黛形輕翻車韻急
偏隔秦樓朱幌餘絢漫想怕短髮難搔助愁千丈
夜色柴門幾聲天更爽

桂枝香

銀魚

平橋永晝慣柔浪寸鱗來問春後長是船橫鴨觜
派流鶯脰高人不見元真子但烟波到今依舊葦
汀花岸千絲作網笑伊還漏更比似針鋒細瘦

好分付吳娘梅樓烹就翠釜芹芽菽乳入甌芳溜
鷗鄉占取閑滋味任年年阻風中酒幾分纖軟堪
人斷腸憶鱸能否

木蘭花慢

賦木犀香數珠

訝熏爐未燼分秋字染鉛丹正露重銅盤風搖鈿
粟暗和沈檀珊珊佩瓔零亂擣花房聲共曉鐘閑
一串胸垂圓相雙心臂纏清寒窗閒待洗塵煩
斜挂處藕絲單認現住冰輪前身香國不算緣慳
更番秋期細數勝纖痕留印在雕闌宛轉仍酬密
願氤氲難解連環

慶宮春

冬夜泊舟鴛湖有憶

倦柳驚鴉澄湖低月墜霜初度蓬罽搖落心情交
加魂夢水天離思難寫賦箋詞筆憶相見秋娘淡
雅淒涼只在學繡村邊曉鐘敲罷可能負卻西
風兩槳來時暮雲凝乍啼紅唾碧衫痕猶浣尙記
那回簾下怨人輕別是纔識香囊分麝孤鴻遙去
說與教知酒醒今夜

換巢鸞鳳

張東園送洋雞一雙賦此報之

一訊槎風有雙棲錦羽攜取筠籠抱時春嶼裏啼
處曉波東洪桃花下幾回逢乍呼小名朱朱未通
瑤窗遠想誤卻凡人同夢珍重誰乞種持比汝
南噤痒神偏聳幘染蠻砂尾捎蜃雨特地移窠分
送我已無心舞秋宵負離看啄苔階縫憑丹青喚

梅家寫伊飛動

清平樂

元夕悼亡姬

春衫淚浣誰問春寒淺依舊去年正月半錦瑟華
年未滿重來徑曲苔荒一屏梅影淒涼疑在小
樓前後不知何處迷藏

沁園春

聲

隔院飛來巧囀如簧初聞可憐正金經學誦生成
柔輦珠歌教唱分外清圓花下泠泠簾中嚙嚙小
玉頻呼密意傳吟郎句慣臨流對月韻更悠然
道將雙字聯翩比相見春風一笑嬌記醽桃幽思
呪餘茸舌折楊離恨噎在香咽細語歡濃嬌啼夢

淺時送吹蘭到耳邊
關情甚聽鶯雛燕乳
仍是笄年

影

賦就閑情願逐娉婷
朝朝整隨恰花陰行
過費他迴顧柳絲遮
住暫爾相離悄照春
波偷窺曉鏡只道無
雙更有伊研丹粉愛
自描活脫小樣崔徽
何妨坐起輕攜怪幾
度拋人欲睡時又低
鬟月底問來不語凝
眸燈下抱處如癡蹴
踣幽坊秋千舊徑看
未分明捉搦遲重逢
後羨香肩斜倚共映
屏幃

水龍吟

題吳東壁大洋汎月圖

憑誰畫就滄溟影連
南極搖空碧茫茫何
在雲帆

吹送高秋今夕蛇種城遙鯁人國杳水天無迹正
銀濤上湧冰丸倒射應笑岸臨風幘 爲問乘槎
此客挹長庚幾經淪謫一官寄耳乾坤奇處肯教
輕擲身到清虛胸吞雲夢舊聞嫌窄看蠻童起舞
澄輝零亂瀉蓮花白

清平樂

春游士女圖

膠鬟新拭正是停針日小扇撲餘無氣力風裏楊
花吹急 銷凝石畔兜鞵不如偎暝蒼苔欲就濃
香一夢翩翩胡蝶飛來

臺城路

題周雪舫運判萬夫人八分遺墨

使君高會詞人處霜風正凋疎柳白雪徵歌青猿

授簡不惜連車沽酒高情感舊展翠閣遺函玉臺
嘉偶錯落蛟龍光和體格最清瘦 人閒謫來未
久悵芝田路杳鸞馭難又伏氏經傳吳家韻寫空
絕才華前後紅絲小籀合長供鈴齋異香熏透夢
井淒涼一編時在手

行香子

憶焦山舊游

落托華顛棲泊頻年展心胸都付山川名區壯觀
勝友奇緣約弔坡公訪綸老謁焦仙 鼉吼更傳
龍抱寒眠記霜崖佛閣燈懸詩囊點檢莫怪蕭然
但貯江風貯江月貯江烟

沁園春

腕

十二樓高隱約輕雲全遮玉容正簾衣半卷斜支
雪藕香羅一握乍斂春蔥膚薄微揜節圓漸露獨
倚霞顚想像中涼侵處有退紅衫袖淺護西風
欠伸在畫屏東見背後凝酥兩欲融更朱繩力怯
秋千齊挽綵絲痕緊端午深籠對脈慵擡傷心小
搯笑學簪花運未工新來瘦問那人知不跳脫旋
鬆

聲聲慢

題停琴士女圖

簾垂有影院靜無聲誰家待月闌干兩點深顰分
付次第眉山薄妝乍倪便低鬟更自幽妍心事遠
看轉將瑤軫尙怯春寒 只有梅花知得愛香生
絃外韻在絲前小立徘徊肯教流響空烟人閒尙

留粉本不愁他輕誤華年凝望處想參橫依約未眠

臺城路

當湖喜晤張今涪別去以詞見寄依韻奉酬

柘西尚有詞人在梅邊愛聽吳語明鏡慵窺青山
欠買贏得吟情如縷高陽伴侶約小醉圍爐孟婆
能阻斜日歸鴉一羣寒影向村塢殘年猶是近
旅津亭仍解纜離恨難譜橫泖蓴鱸東湖烟水輸
與漁兒漁女心期暗許在第六橋頭酒旗茶鼓一
片春光快教胸臆吐

留宿張龍威藝舫同話丁卯舊遊有感
用前韻

重來君有攬先卜燈昏昨宵如語問訊東湖年時
柳色猶賸烟中殘縷英游俊侶歎范蠡船遙黃公
壚阻一曲南莊更無人過白雲塢 乾坤總成逆
旅化兒多戲劇顛倒誰譜風掩閑門冰澌老硯絕
代空吟貧女淹留未許早歲晚天寒又催津鼓別
夢依依小樓窗日吐

沁園春

己巳除夕偶讀楊南峯循吉詩云買錫
迎竈帝酌水祀牀公吳蓋同杭俗也予
老嬾無事所須者飽食安眠而已因賦
沁園春二闋以當樂神之詞

天上歸來司命醉餘家人合迎訝蒙莊書幻神原
號髻諾臯志怪童亦名釧難覓黃羊祇斟綠螳小

市簫聲喚買錫寒宵盡早踞觚語好黔突春生
辦香脈脈通靈訴口腹尋常累不輕歎火需朋舉
常如僧飯釜非嫖轅那羨侯鯖避煬何人先炊有
典一飽無求掩竹局吾儕事向山空歲晚稍理遺
經

又

安穩閑房仗爾平生寢興載司記窗橫窺月情柔
似水屏遮聽雨鬢改成絲金盡低顏玉存暖老漸
近橫陳嚼蠟時吾衰矣但摸棱不管趺坐偏宜
一杯酌爾休辭想此夕殷勤也合知笑放懷物外
年年夢蜨求官何處日日搭龜早起雖慵春來更
健睡法希夷好護持甯須羨設沈香八尺花下頻
移

疎影

小玲瓏山館賦絮影

飛絲近遠又綠陰弄日吹過隋苑比雪還輕度水
無痕東風下上低捲成團作隊冥濛甚真共幻總
迷心眼倚繡簾誤卻吹時明滅箇人庭院 尙憶
張郎好句正朦朧淡月墜處初暝漫綴征衣點鬢
休驚欲捉兒童仍嬾悠颺夢入離亭路寫不盡楚
江春晚笑雨餘一種霑泥付與老禪爲伴

一剪梅

立夏後一日同人集晚清軒補作送春
之會

吟鬢蕭疎客夢輕春盡忘情春去關情問春去了
幾何程鳩作雙聲燕作雙聲 櫻筍盤筵理舊盟

芳夜心爭涼夜心爭綠陰便是短長亭歌攢春行
酒駐春行

摸魚兒

透風透月兩明軒賦新荷

掃千紅已隨流去綠雲南浦偷換錢錢點點田田
樣浮動鏡心纔滿青蓋輒想早畏朱曦爲覆雙鴛
伴全舒尙卷似龍女牋緘鮫人怕束含憶又含怨
西湖好何處羅帶玉腕采香休道來晚粉紅未
逐薰風嫁扇底且藏嬌面珠倒濺聽驟雨聲聲譜
入歌喉囀吟騷意嬾任細裊冰絲低搖翠柄衣小
那堪翦

柳梢青

效許圭塘體

鬢點吳鹽十年來去苧翦征衫千里鶯花幾重烟
水一片雲帆鄉園試話情忺有黛染明湖鏡匳
佛土茶香漁村蓴滑好箇江南

又

佳處曾探量泉惠麓踏蘚靈巖多少吳娃明妝倚
舫玉面乘籃秧田竹屋蘆簾指歸路垂虹舊諳
瑟瑟波搖彎彎月唱好箇江南

又

臘尾春緘楓霞徧綴梅雪相兼新綠初成輭紅不
到水國無炎女湖兒店程添記茗雪秋風挂帆
洲渚神仙樓臺烟雨好箇江南

又

湖傲山酣綠蓑白雨紫筍黃柑蠶戶新封鷗鄉近

署當了頭銜 興來浪跡猶堪訪酒社詩朋快談
焦洞潮聲攝山月色好箇江南

齊天樂

庚午夏五將歸湖上留別韓江吟社諸
公

平生慣向蕪城客吳絲暗斑雙鬢雪嶺才高青樓
句好那比前人疎俊吟朋勝引愛款竹尋題占花
分韻忽覺歸心一燈搖夢野鷗近 湖山此時舊
隱玉壺涼萬斛紅膩蓮暈江雨鳴篷林風解纜離
緒滿於潮信流連未盡謝送我多情熟梅芳醞彈
指秋清重逢期定準

送樊榭歸西湖

馬曰琯

廉纖細雨侵衣袂梅天最難調攝苦筍過牆青

苔上砌客裏光陰飄忽懷歸念切擬暫瀹茶鐺
少留吟篋只恐紅衣待君香散半湖月 吹簫
何處濯髮浸空明一片消盡炎熱喚艇邀涼凭
闌覓句沙際白鷗凝雪那堪閒閣定驀憶山齋
幾般縈結莫負秋窗滿林蟬亂咽

又

馬曰璐

片帆約共雲陰遠相看已縈愁緒淡景邀詩遙
情入畫綠暗前時來路汀荷苑樹有花底魚經
柳邊簫譜水夢山魂朗吟飛向鏡奩去 湖頭
應憶舊侶正疎篁露滴如對幽語病渴文園耽
佳飯顆算是襟分幾度離杯漫舉待潮落江天
片時延佇只到涼秋剪燈同聽雨

樊榭山房續集卷第十

錢唐 厲 鶚 太鴻

詞乙

北樂府
小令附

人月圓

黃鐘宮

甘露寺懷古

夕陽江上吳朝寺曾記昔留題火焚松徑塵埋蓮
蘂雨洗苔碑樓空多景鐘聲今古帆影東西花
開花謝潮生潮落物是人非

長安某氏廢園

行人指點城南路往事半模糊烏衣門巷平泉樹
石金谷笙竽當時深貯娘名御史妾號尙書而
今但有空池飛燕破瓦奔狐

叨叨令

正宮

碧浪湖感舊

月圓波靜蘇灣暮一船兩槳橫塘渡秋燈紅袖曾
偷護曉妝青鏡初回顧憶殺人也麼哥憶殺人也
麼哥重來都是傷心處

醉太平

正宮

看梅宿西溪山莊

掩簋笆野橋護莎砌田垌梅花雪擁閣如巢供吾
儕睡飽溪深溪淺隨春笑窗明窗暗疑人到鐘初
鐘絕帶詩敲剩香吟半瓢

東郊小隱

小人哉學圃諸生耳傭書門前綠柳蔭清渠東風
菜吐游仙枕外分朝暮牽絲棚外看來去選官圖
外論羸輸閑中樂乎

題村學堂圖

村夫子面孔渴睡漢形容周遭三五劣兒童正拋
書興濃探雛趁蝶受朋儕哄參軍蒼鶻把先生弄
甘羅項橐笑古人聰不樂如菜傭

春雨

溼東風燕剪灑芳樹秋千埽晴娘拜惜花天對珠
簾暮捲濛濛遮住宜春院絲絲吹上傷春面瀟瀟
唱出送春筵好春光去遠

初夏園居

野荼蘼蓋瓦水楊柳穿笆翠畦深護小人家看童
兒戲耍種瓜不長東陵價賜櫻不羨長安話澆蔬
不減漢陰佳任東風過馬

後庭花

仙呂宮

冬日同江聲登吳山

仙山迴磴重，酒樓空翠中。
霜落千門樹，風清十廟鐘。
夕陽東越王，何在鴉翻江上峯。

次韻

金志章

林疎翠靄重，山圍閭井中。
輦道穿危磴，叢祠響午鐘。
酒樓東天開圖畫，煙江千萬峯。

醉中天

仙呂宮

張龍威送醉蟹

無復爬沙樣，風味付廚娘。
纖手紅椒擘，繡匡只合糟。
正葬春雨瀟瀟，夜窗背燈，
情況畫眉人肯分將。

事見張
敞集

一半兒

仙呂宮

金華寶婺觀

雲衣月面佩珊珊夜駕天風下古壇響入赤松山
外山篆煙殘一半兒浮空一半兒散

吳甌亭瓶花齋翦橙小集

移從夜雨記親栽翦向西風入手纔剖霧莫辭傾
翠醅輒金杯一半兒詩成一半兒改

上虞百官江口舜廟

重瞳此地有遺苗野廟空江玉座銷無復百官趨
早朝話漁樵一半兒龍工一半兒鳥

浮山禹廟和嶰谷

雲根不出廟庭隅神怪當年豈盡誣塑壁尙存山
海圖看模糊一半兒蝸涎一半兒雨

吳山伍公廟

青山遙對海門斜時見靈旗溼浪花夜夜潮驚

萬家閃棲鴉一半兒聲回一半兒打

鶴林寺米襄陽祠

仙花僧竹認松龕遺像依稀海岳菴野鼠有時鬚
被銜護伽藍一半兒塵添一半兒減

淮陰漂母祠

淮流日夜走青蘆老屋煙煤一飯餘亭長有妻曾
媿無漢規模一半兒韓侯一半兒母

松江超果寺一覽樓寫望

潮迴黃歇浦邊春天界秦皇道上曛山冷陸機茸
內雲畫難分一半兒丹青一半兒粉

題吳抱村閑居消夏圖

綠楊風裏掩茅茨紅藕香中收釣絲翠竹影邊吟
小詩日長時一半兒橫經一半兒史

青歌兒

仙呂宮

悼吳中歌者

花前偷回嬌盼賞知音舞袖弓彎何處秋墳唱夜
闌拋卻青團扇兒閑風流旦

元夏雪叢青樓集李嬌兒人目爲風流旦

四塊玉

南呂宮

題大滌貝鍊師房

種藥鉏分茶筦蒼檜空堂隱臞仙碧桃幽徑閑尋
徧一柱煙五洞天九鎖泉

沈歸愚侍郎天台歸過訪

霜滿鞦韆塵侵馬白首諸公戀東華相逢愛說天台
話躡嶠霞飯澗麻吟瀑花

閱金經

南呂宮

同吳可堂游潮鳴寺

竹外青蓮座水邊黃面僧掃葉烹茶折脚鐺迎罷
翻金字經蒼苔徑看碑廊下行

澆藥井

抱甕忘機事栽花消俗緣中有桐君上品傳泉飛
流當暑天雲漿噉主人平地仙

朝天子

中呂宮

送樓于湘歸吳門

稻齊鱸肥久憶吳中味乘秋帆影去如飛嫋嫋菱
歌起鶴市誰依鴻廡單棲算歸時仍客裏得歸且
歸吟不了煙波意

同作

馬曰璐

擬行未行猛賦得歸期定木犀香裏晚雲晴盼
殺臯橋影秋五湖清月二分明寫相思兩地情

酒城鴨城莫忘了盟鷗等

紅橋納涼

藕湖柳渠亭館風多處十年隋苑舊詩逋團扇招
涼句茉莉鬟酥薔薇衣露隔船窗聞笑語不須醉
扶月上紅橋去

春煙

遠林翠侵煥處迷離甚夜來輕抹畫廊深和月梨
花浸裏上羅襟飛上瑤簪似幽期一縷心再尋至
今春有禁情難禁

滿庭芳

中呂宮

殘秋湖上有懷月田筠谷穆門三君之
歿

湖山宴娛景留年去社散人徂畫橋煙艇風蒲路

極目愁予夢已隔黃公酒壚寫難窮白傅詩圖秋
光暮碧雲紅樹泉下得知無

題王茨簷北郭移居圖二曲

生涯自遣嫌居市并喜近田園酸寒東野唯詩卷
家具蕭然鈍榜上高題狀元醉鄉中舊署神仙尋
君便林鶯乍囀卽此賀新遷

鄰家大有東屯雞柵北郭漁舟鐙中煮字今能句
飽矣何求羊角埂看花慢走兔兒泉裏茗閑游歸
來候遙山滿眸紫翠一筇收

辛未重午嶰谷半查招集行菴分韻

籬閑六枳階苔更掃徑竹新孳觴蒲有客過三四
荆楚佳時王播去功名似此孟嘗生富貴何之開
胸次須行樂耳不用讀騷辭

紅繡鞵

中呂宮

正月十六日同江聲可堂龍泓游吳山
分得開字

三五夜將錢更買第一樓有酒初開士女燒香墜
金釵春潮和月上暮靄送詩來燈街人似海

春晚

情黯黯花前側帽路茫茫月底吹簫花月江南憶
新妖詩匳吟芍藥夢枕墜櫻桃人隨春共老

普天樂

中呂宮

題行菴爲馬嶰谷半槎兩君觴詠地在
揚州北郭天寧寺西

碧蘿垣蒼簷徑簷花月明庭樹秋聲暮分謝墅幽
榻下蕭齋靜大小山名堪移贈卜行窩招友經行

行廚醉醒行衣露冷行篋詩清

春水

雪初消波微溜鵝肫蕩口鶯脰湖頭藍拖打槳人
綠染湔裙候何事干卿吹頻皺笑東風直恁風流
情如此柔殘紅漾久還妝樓

喜春來

中呂宮

春柳

初過元夜新黃蘸剛近清明嫩綠攪小紅樓外拂
毵毵黏畫衫飛絮滿江南

山坡羊

中呂宮

秋雨初霽嶰谷半槎招同人集看山樓
填此曲予以病不赴

瓷青天逗綃紅霞漏井梧缺處山新瘦雨初收酒

新篳鯉風試弄凭闌袖自笑文園多病後秋嬾上樓愁還獨謳

春日郊行

春山如笑春流堪照桃花紅出疎籬靠醉村醪聽神簫社公雨灑潮王廟雲影弄晴歸尚早橋魚散苗郊燕定巢

梧葉兒

商調

春山

窗中岫天外峯雪淨遠連空淡冶河陽重浮嵐北苑工暖翠井西同遙念著眉梢更濃

小桃紅

越調

橫波夫人畫蘭扇敬身索賦

秦淮不見翠雙顰摺扇香痕潤往事眉樓有誰問

墨花春靈均舊怨都銷盡南朝豔粉才人風韻題
詠到湘裙

龔宗伯有題畫蘭裙子如夢令爲橫波作也

吳江道中

一篷風色一橈雲詩有江湖分第四泉邊綠陰襯
夏寒新憑誰寄箇松陵信楊花浥褪楝花飛近金
鴨煖梅魂

柳營曲

越調

尋秦淮舊院遺址

支瘦筇訪城東板橋夕陽依舊紅名士詞工狎客
歌終醉臥錦牋叢閑愁埋向其中溫柔老卻吳儂
香銷南國盡花落後庭空風吹夢去無蹤

春夜汎湖

停漏籤展冰匳春湖可人花月兼蜨夢厭厭柳影

纖纖山隔夜明簾呼燈重問青帘叩舷同唱烏鹽
汭流光三塔動衝香霧六橋黏尖風起索衣添

漁家

漁事多柰漁何漁心太平誰似我春雨漁蓑落日
漁艇漁舍水雲窩約漁兄漁弟經過聚漁兒漁女
婆娑漁竿連月浸漁網帶煙拖歌漁笛定風波

漫作效康汧東體

回敝車守空廬貧中自憐貧有餘烏識親疎花驗
榮枯笑讀古人書扁舟不逐陶朱布衣空羨丹徒
英雄重俯仰事業一欵歔初只合老樵漁

春思效張小山體

紅漸稀綠初肥暖風一團香絮飛春入長眉春著
單衣無處問相宜乍開簾芳草東西倦凭闌粉蝶

高低鳥聽秦吉了花發蜀當歸伊誤了牡丹期

沈醉東風

雙調

春日西湖

謁東閣平生未肯典西湖此事休云約酒朋探芳
信賣錫天柳嬌花嫩老作承平快活人看鏡裏春
山似哂

元劉致中醉中天自注云宋諺有典賣西湖之語臺諫謂之賣了西湖既賣則不可復省院謂之典了西湖猶可贖也無官守無言責此古人所以輕視軒冕歟

紅橋水亭看荷

移舫子雲陰半掩倒闌干魚影深潛池分九曲涼
花比重湖豔看娉婷不隔湘簾疎雨催詩意未忺
但葉上聲來數點

折桂令

雙調

金陵朝天宮秋寓

笑平生詩卷生涯偶寄雲房似到仙家鏡照山精
鐘敲夜斗鼎鍊秋霞申地園不留破瓦卞公墳誰
種殘花莫羨豪華六代興亡衰柳啼鴉

賦得客帳夢封侯

傍幽窗斗帳淒涼何許儒冠忽擁油幢虎士趨風
蛾眉環坐珠履成行班祭酒須輕故鄉李將軍得
遇高皇萬里名揚萬戶勲償一枕邯鄲總是荒唐
題殿畫乞巧圖

剩前朝一橙丹青長信昭陽無限秋情金合藏蛛
綵橋度鵲紈扇飛螢聽玉漏遲遲五更拜銀灣脈
脈雙星梧桐影閑庭不卜他生但祝今生

低髻

理香絲樣減菱銅緊綰螺尖不放鴉鬆翠葉斜安

金釵短插羅帕輕籠行雲穩微微楚峯墮花慳小
小吳宮傳徧城中壓倒韋娘見慣司空

述懷

問先生底事窮愁放浪形骸笑傲王侯不隱終南
不官彭澤不訪丹丘搔白髮三千丈在手算明年
六十歲平頭天許奇游弄月蛟門看雨龍湫

西湖次趙文寶韻

比西湖西子爭誇西子看來尙遜穠華不盡雲山
無窮煙柳可惜風花斜陽在黃妃舊塔醉鄉眠蘇
小誰家流水殘霞新月如牙油壁香車歸去吳娃

浩然巾

展鮫綃一幅裁雲素頸遮寒翠鬢藏春踏雪風流
尋梅窈窕照鏡溫存分明是江妃後塵又猜疑孟

浩前身詩客知恩剛近香肩凍粟無痕

題徐安生桂花湖石小幅爲丁龍泓作
是何人染出秋光石擬聞蒼樹訝懸香纖手皴苔
柔毫暈碧嬌額分黃權當作如來供養也應教才
子收藏腸斷吳閶漂泊多情老去徐娘

懷嶰谷游金陵效疊韻體

溯空行小艇風輕萬頃潮平清興堪乘山迴雲生
林青雨映一燈金陵景陽井苔崩舊京石頭城煙
冷新亭茶鼎禪燈竹徑江聲酒聖詩盟少摒塵纓
緩定歸程

楊妃病齒延清齋分賦

宴華清何限歡娛底事朝來粉悴香癰柳葉微顰
瓠犀小冷棠萼愁吁沒亂煞開天帝主敕離支休

進中廚塞上思酥突騎長驅活玉巢中且忍須臾
清江引 雙調

蘇堤春曉

誰家總宜船玩景落月長隄暝柳煙舒翠屏花露
揩明鏡西施帳中春夢醒

花港觀漁

東風倚闌花似雪小汊分鱗鬣魚將花吐吞花逐
魚明滅人生不如魚樂也

柳浪聞鶯

小鶯擲梭風柳靡翠線波痕細雙柑酒便攜兩豆
塵休閉百單八聲春去矣

麴院風荷

風漪四圍深院宇荷氣銷炎處斜明柳外虹亂颭

萍閒鷺來看翠盤高下舞

兩峯插雲

南北兩高青對聳氣溼雲飛動牛頭縹渺齊馬耳
冥濛共僧歸雨來龍颺湧

平湖秋月

月明滿湖剛著我不攪魚龍臥碧瀾寸寸秋桂子
紛紛墮星河醉驚都繞舸

三潭印月

魚王國中看月上三塔遙相望浮珠白一丸沈璧
寒千丈夜深老禪心一樣

雷峯夕照

黃妃塔頽如醉叟大好殘陽逗渾疑劫燒餘忽訝
飛光候漁村網收人喚酒

南屏晚鐘

鯨鏗一聲山鳥駭響徹青松外雲遮五百閒月上
三千界歸舟幾聽頭漸白

斷橋殘雪

水南數峯皴粉少玉竦澄餘照鷗邊草欲蘇驢背
梅初笑林逋宅荒猶未掃

菜貴戲作

晚菰一筐堪適口莫笑貧家陋求添轉不能問價
高於舊宜州老人空肚久

落梅風

雙調

華秋岳爲予寫西溪卜居圖因題其上
橫斜影清淺溪翠濛濛嫩寒山氣梅花見招深處
棲草堂資故人誰寄

孤山訪梅

蜂鬚朵鶴膝枝背湖陰杳無人至逋仙墓前春若
此瘦吟肩聳成山字

歲除得沈椒園山東書

琴工欠藥券遲逼殘年有臺難避門前雁行誰解
圍沈三兄俸錢遙寄

張說謂沈佺期曰沈三兄詩
須還他第一椒園行三故云

鄰牆杏花

高樓雨深巷風惜花人作詩無用紅香笑窺牆角
東笑先生白頭非宋

嶰谷送漳蘭

心占易佩擬騷兩三莖送秋先到吐幽香暗將炎
晝消雪窗僧寫來難肖

原作

馬曰琯

清風灑涼露滋瘦亭亭自憐幽致伴同心玉琴
調七絲小窗中略添秋思

水仙子

雙調

虎丘書所見

王珣宅畔曉鐘催朱勔花邊午店開仇英畫裏春
妝賽趁清明冷食來施山僧那惜金釵低潤臉男
兒拜整新裙侍婢擡恨無端落日船回

竹下水仙

翠雲影掠玉鈿柔蒼雪聲搖金瑣流天寒正倚佳
人袖是何年雅蒜收傍琅玕鵝管花抽墨胎子生
來瘦楚湘娥分外愁合就清幽

齊瓊臺侍郎雪中過訪

十年握手意偏深千里言懷喜不禁三公折臂君

尤甚臥天台琪樹陰惹蒼生望到而今剡雪淒清
興江雲縹緲心有約聯吟

謝馬嶰谷半槎惠人履

靈苗合在阮生家香藥應須溫尉誇連根便是邊
鸞畫價兼金難賽他起沈疴何必丹砂秋寄逢江
雨晨煎汲井花此意無涯

殿前歡

雙調

秋思用張小山春思韻

寫秋思芭蕉葉葉竹枝枝南湖風雨涼何自潘鬢
成絲蟲聲唱鬼詩雁影排人字鳳紙書仙事餘香
滅後幽夢回時

春草

燒痕春無端喚起踏青人青青有盡愁無盡不入

侯門禮將落日薰媚借飛花襯色作羅裙認小卿
墓上匹子湖濱

撥不斷

雙調

晚秋田家

倚霜根望前村西風漸掠歸鴉陣稻熟租分斛面
勻菊香醉枕鉏頭穩是非休問

枳郎兒

雙調

月夜過吳梅查青棠館

趁微涼訪書堂淡月正昏黃卅字闌干亞字牆新
詞同唱合歡花影轉東廊

樊榭山房續集卷十

YORK UNIV

MAY 15 2001



